



09836

禮

元之五禮皆以蒙古本俗行之惟祭祀稍稽舊禮而中葉禮官所攷郊廟之儀雖稱詳慎終未見之施行自世祖混一六合凡六世其南郊之禮皆遣官攝事未嘗親祀至文宗始舉行至大間大臣議立北郊而中輟遂廢不講至於太廟之祀惟武宗親享於廟者三英宗親享者五泰定帝在位四年未嘗一廟見文宗以後乃復親享豈非以道釋禱祠薦禳之盛造營寺宇竭生民之力有所重則有所輕與北陲之俗敬天而畏鬼其巫祝每能親見所祭者而知其喜怒故天子非有察於幽明之故則未能破俗論而行自憲宗祭天日月山追崇所生考爲睿宗與太祖竝配其

元史卷七十八

志

一

不合典禮者一世祖所建太廟皇伯朮赤察合帶皆以家人禮祔於列室其不合典禮者二而太宗定宗以世天下之君俱不獲與追尊之睿宗同其廟享至成宗立復崇所生考爲裕宗而憲宗亦以不祀其不合典禮者三睿裕祔太廟已不合禮而成宗二年又遣使特祀裕宗於太廟而不祀其在廟之祖宗尤不合典禮者四武宗立追尊皇考懷王爲帝則其先封懷王明矣乃舊史直稱荅刺麻八刺之名始終不言何封其荒謬者五夫郊廟大祀國家根本而喬野至是更何論中祀以下與婚喪之儀哉其天子親遣使致祭者如社稷先農宣聖而嶽鎮海瀆使者奉璽書卽其處行事又有古帝王廟武成王周公廟及名山大川忠臣義士之祀功臣之祠皆前代所相仿惟日星始祭於

司天臺而回回司天臺遂以禳星爲職事五福太乙有壇時以道流主之皆所未詳大凡元代祭祀之事備於太常集禮及經世大典之禮典篇參以累朝實錄其沿襲唐宋舊文者概不重錄惟其參用本俗與前代異者錄之以備因革至羣臣博士等先後所議郊祀既未舉行空言何益存其梗概不復詳焉

郊祀

元興朔漢代有拜天之禮衣冠尙質祭器尙純帝后親之宗戚助祭報本反始出於自然有太古之遺意憲宗卽位之二年秋八月八日始以冕服拜天於日月山其十二日又用孔氏嗣孫元措言合祭昊天后土始大合樂作牌位以太祖睿宗配享歲甲寅會諸王子顯顯海子之西丁巳

元史卷七十八

志

禮

秋駐蹕于軍海子皆祭天於其地世祖中統二年親征北方夏四月乙亥躬祀天於舊桓州之西北灑馬湏以爲禮皇族之外無得而與皆如其初至元十二年十二月以受尊號遣使豫告天下太常檢討唐宋金舊儀於國陽麗正門東南七里建祭臺設昊天上帝皇地祇位二行一獻禮自後國有大典禮皆卽南郊告謝焉十三年五月以平宋遣使告天地中書下太常議定儀物以蒙古本俗行事三十一年成宗卽位夏四月壬寅始爲壇於都城南七里甲辰遣司徒兀都台率百官爲大行皇帝請諡南郊爲告天請諡之始大德六年春三月庚戌合祭昊天上帝皇地祇五方帝於南郊遣左丞相哈刺合孫攝事爲攝祀天地之始大德九年二月二十四日右丞相哈刺合孫等言去

年地震星變雨澤愆期歲比不登祈天保民之事有天子親祀者三曰天曰祖宗曰社稷今宗廟社稷歲時攝官行事祭天國之大事也陛下雖未及親祀宜如宗廟社稷遣官攝祭歲用冬至儀物有司預備日期至則以聞詔翰林集賢太常禮官皆會中書與博士集議疏曰冬至圜丘惟祀昊天上帝至西漢元始間合祭天地歷東漢至宋千有餘年分祭合祭迄無定論攷周禮冬至圜丘禮天夏至方丘禮地時既不同禮樂亦異王莽之制何可法也今當循唐虞三代之典惟祀昊天上帝其方丘祭地之禮續議以聞又周禮壇壝三成近代增外四成以廣天文從祀之位恐壇上陞隘物器難容擬四成制內減去一成以合陽奇之數每成高八尺一寸外設二壝內壝去壇二十五步外

壝去內壝五十四步壝各四門壇設於丙巳之地以就陽位又古者親祀冕無旒服大裘而加衮臣下從祀冠服歷代所尙其制不同今宜依宗廟見用冠服制度又周禮大司樂云凡樂圓鍾爲宮黃鍾爲角太簇爲徵姑洗爲羽雷鼓雷鼗孤竹之管雲和之琴瑟雲門之舞冬至日於地上之圜丘奏之今國家未制樂舞宜訪求深知音律之人以司肄樂夏四月壬辰中書復集議博士言舊制神位版用木中書議改用蒼玉金字白玉爲座攷郊祀尙質合依舊制遂用木主議者復謂神主廟則有之今祀於壇對越在上非若他神無所見遂止不用七月博士又言古者祀天器用陶匏席用橐鞞自漢甘泉雍時之祀以迄後漢晉魏南北朝隋唐其壇壝玉帛禮器儀仗日益繁縟浸失古

者尙質之意宋金多循唐制其壇壝禮器固未能全合經典其儀法具在亦當時名儒援經所定宜酌古今以行禮今檢討唐宋金親祀攝行儀注竝雅樂節次合從集議太常議以唐宋皆有攝行之禮除從祀受胙外一切儀注請悉依唐制修之八月中書省臣言自古漢人有天下其祖宗皆配天享祭今宗廟已依時祭享其郊祀止祭天制曰可是歲南郊配位遂省十一年武宗卽位秋七月甲子命御史大夫鐵古迭爾卽南郊告謝天地主用柏素質玄書爲卽位告謝之始至大二年冬十月乙酉尙書省臣及太常禮官言郊祀者國之大禮今南郊之禮已行而未備北郊之禮尙未舉行今年冬至南郊請以太祖聖武皇帝配享明年夏至北郊以世祖皇帝配皆允行十二月甲辰朔

尙書太尉右丞相太保左丞相等復奏曰南郊祭天於圜丘大禮已舉其北郊祭皇地祇於方澤竝神州地祇五岳四瀆山林川澤及朝日夕月皆國家所當崇禮當聖明御極而弗舉行恐遂廢弛明年春正月申書禮部移太常下博士擬定北郊從祀朝日夕月禮儀博士等議其壇亦以三成爲式每成高四尺於中爲方壇三成四陛外爲三壝宮室牆圍器皿色竝用黃其神州地祇以下從祀請遵唐制以嶽鎮海瀆山林川澤巨陵墳衍原隰各以其方從祀十一月丙申有事於南郊以太祖配五方五帝日月星辰從祀仁宗延祐元年夏太常寺臣請立北郊議中止英宗至治二年九月命羣臣復會議南郊一曰年分二曰神位三曰配位四曰告配五曰裘冕六曰匏爵七曰戒誓八曰

散齋致齋九曰藉神席十曰犧牲十一曰香鼎十二曰割牲十三曰大次小次續具未議四事一曰禮神玉二曰飲福三曰升煙四曰儀注議上會太皇太后崩遂罷郊祀事泰定四年春正月御史臺臣復請親郊及親享太廟詔仍命大臣攝祀至順元年文宗始議親郊丙辰監察御史楊彬等請享帝以始祖爲配先祀一日皇帝備法駕出宿郊次於是十月辛酉始服大裘袞冕親祀昊天上帝於南郊以太祖配自世祖混一六合至文宗凡七世而南郊親祀之禮始克舉焉自至元十二年冬十二月用香酒脯饗行一獻禮而英宗至治元年冬二祭告泰定元年之正月咸用之自大德九年冬至用純色馬一蒼犢一羊鹿野豕各九十九一年秋七月用馬一蒼犢正副各一羊鹿野豕各九

元史卷七十八志

禮

五

而至大中告謝五皇慶至延祐告謝七與至治三年冬告謝二泰定元年之二月咸如大德十一年之數泰定四年閏九月特加皇地祇黃犢一將祀之夕敕送新獵鹿二惟至大三年冬至正配位蒼犢皆一五方帝犢各一皆如其方之色大明青犢夜明白犢皆一馬一羊鹿野豕各十有八兔十有二而四年四月如之其犧牲品物香酒皆參用國禮而豐約不同告謝非大祀而用物無異豈所謂未能一舉而大備者乎南郊之禮其始爲告祭繼而有太祀皆攝事也故攝祀之儀特詳順帝至正親郊之禮凡再舉行一在三年十月一在十五年十一月皆以太祖皇帝配享園丘如舊行儀制右丞相爲亞獻官太尉樞密知院爲終獻官御史大夫爲攝司徒樞密知院爲大禮使中書平章

二人爲侍中御史大夫中書右丞二人爲門下侍郎宣徽使太常同知二人爲禮儀使宣徽院使執劈正斧其餘侍祀官依等第定擬前期八月初七日太常禮儀院移關禮部具呈都省會集翰林集賢禮部等官講究典禮九月內承奉班都知具錄親祀南郊儀注與唐宋金略同不具錄

宗廟

元代祖宗祭享之禮割牲奠馬鍾以蒙古巫祝致辭蓋本俗也世祖中統元年秋七月丁丑設神位於中書省用登歌樂遣必闐赤致祭焉必闐赤譯言典書記者十二月初命製太廟祭器法服二年九月庚申朔徙中書署奉遷神主於聖安寺辛巳藏於瑞像殿三年十二月癸亥卽中書省備三獻官大禮使司徒攝祀事禮畢神主復藏瑞像殿

元史卷七十八

志 禮

六

四年三月癸卯詔建太廟於燕京十一月丙戌仍寓祀事中書以親王合丹塔察爾王磐張文謙攝事至元元年冬十月奉安神主於太廟初定太廟七室之制凡室以西爲上以次而東二年九月初命滌養犧牲取大樂工於東平習禮儀冬十月己卯享於太廟尊皇祖爲太祖三年秋九月始作八室神主設祔室冬十月太廟成丞相安童伯顏言祖宗世數尊諡廟號配享功臣增祀四世各廟神主七祀神位法服祭器等事皆宜以時定乃命平章政事趙璧等集議製尊諡廟號定爲八室烈祖神元皇帝皇曾祖妣宣懿皇后第一室太祖聖武皇帝皇祖妣光獻皇后第二室太宗英文皇帝皇伯妣昭慈皇后第三室皇伯考朮赤皇伯妣第四室皇伯考察合帶皇伯妣第五室皇考睿宗

景襄皇帝皇妣莊聖皇后第六室定宗簡平皇帝欽淑皇后第七室憲宗桓肅皇帝貞節皇后第八室十一月戊申奉安神主於祔室歲用冬祀如初禮四年二月初定每歲十二月薦新時物六年冬時享畢十二月命國師僧薦佛事於太廟七晝夜始造木質金表牌位十有六設大榻金椅奉安祔室前爲太廟薦佛事之始七年十月癸酉敕宗廟祝文書以蒙古字八年八月太廟柱朽從張易言告于列室而後修奉遷粟主金牌位與舊神主於饌幕殿工畢安奉自是修廟皆如之丙子敕冬享毋用犧牲十二年九月丁丑敕太廟牲復用牛十月己未遷金牌位於八室內太祝兼奉禮郎申屠致遠言竊見本主旣成又有金牌位其日月山神主及中統初中書設祭神主安奉無所博士

元史卷七十八

志

禮

七

議曰合存祔室粟主舊置神主牌位俱可隨時埋瘞不致神有二歸太常少卿以聞制曰其與張仲謙諸老臣議行之十三年九月丙申薦佛事於太廟命卽佛事處便大祭己亥享於太廟加薦羊鹿野豕是歲改作金主太祖主題曰成吉思皇帝睿宗主題曰太上皇耶可那顏皇后皆題名諱十四年八月乙丑詔建太廟於大都博士言古者廟制率都宮別殿西漢亦各立廟東都以中興崇儉故七世同堂後世遂不能革十五年五月太常卿還自上都爲議廟制據博士言同堂異室非禮以古今廟制畫圖貼說令博士李天麟齋往上都分議可否以聞一曰都宮別殿七廟九廟之制祭法曰天子立七廟三昭三穆與太祖之廟而七諸侯大夫士降殺以兩晉博士孫毓謂外爲都宮內

各有寢廟別有門垣太祖在北左昭右穆以次而南是也前廟後寢者以象人君之居前有朝而後有寢也廟以藏主以四時祭寢有衣冠几杖象生之具以薦新物天子太祖百世不遷宗亦百世不遷高祖以上親盡則遞遷昭常爲昭穆常爲穆同爲都宮則昭常在左穆常在右不失其序一世自爲一廟則昭不見穆穆不見昭各全其尊必祫享而會於太祖之廟然後序其尊卑之次蓋父子異宮祖禰異廟所以盡事亡如事存之義然漢儒論七廟九廟之數其說有二章玄成等以謂周之所以七廟者以后稷始封文王武王受命而王是以三廟不毀與親廟四而七也如劉歆之說則周自武王克商以后稷爲太祖卽增立高圉亞圉二廟於公叔太王王季文王二昭二穆之上已爲

七廟矣至懿王時始立文世室於三穆之上至孝王時始立武世室於三昭之上是爲九廟矣然先儒多是劉歆之說二曰同堂異室之制後漢明帝擗儉自抑遺詔無起寢廟但藏其主於光武廟中更衣別室其後章帝亦復如之後世遂不敢加而公私之廟皆用同堂異室之制先儒朱熹謂至使太祖之位下同孫子而更僻處於一隅無以見爲七廟之尊羣廟之神則又上厭祖考不得自爲一廟之主以人情論之生居九重窮極壯麗而設祭一室不過尋丈甚或無地以容鼎俎而陰損其數子孫之心於此曷安且如命士以上其父子婦姑猶且異處不相褻瀆況貴爲天子而祖宗神位數世同處一堂有失人子事亡如事存之意不報十六年八月丁酉以江南所獲玉爵及玷凡四

十九事納於太廟十七年十二月甲申告遷於太廟癸巳承旨和禮霍孫太常卿太出圖忽思等以祔室內粟主八位并日月山板位聖安寺木主俱遷甲午和禮霍孫太常卿撒里蠻率百官奉太祖睿宗二室金主於新廟安奉遂大享焉乙未毀舊廟十八年二月博士李時衍等議歷代廟制俱各不同欲尊祖宗當從都宮別殿之制欲崇儉約當從同堂異室之制三月尙書段那海及太常禮官奏曰始議七廟除正殿寢殿正門東西門已建外東西六廟不須更造餘依太常寺新圖建之遂爲前廟後寢廟分七室二十一年三月丁卯太廟正殿成奉安神主九月廟室掛鐵網釘鑿籠門告成二十二年十二月丁未皇太子薨太常博士議曰前代太子薨梁武帝諡統曰昭明齊武帝諡

長懋曰文惠唐憲宗諡靈曰惠昭金世宗諡允恭曰宣孝請建別廟以奉神主準中祀以陳登歌例設令丞歲供酒掃中書翰林諸老臣亦議從之立別廟奉祀遂諡曰明孝太子作主用金二十五年冬享制送白馬一三十年十月朔復以皇太子別廟神主祔太廟三十一年成宗卽位追尊皇考爲皇帝廟號裕宗元貞元年冬十月癸卯有事太廟及奉玉冊玉寶命獻官迎導入廟大德元年十一月太保月赤察爾等奏請廟享增用馬制可二年正月特祭皇考裕宗於太廟用馬一牛一羊鹿野豕天鵝各七餘品如舊爲特祭之始四年八月以皇妣皇后祔六年五月戊申太廟寢殿災十一年武宗卽位追尊皇考爲皇帝廟號順宗太祖室居中睿宗西第一室世祖西第二室裕宗西第

三室順宗東第一室成宗東第二室追尊先元妃爲皇后
祔成宗室至大二年春正月乙未以受尊號恭謝太廟爲
親祀之始十月以將加諡太祖睿宗擇日請太祖睿宗尊
諡于天擇日請光獻皇后莊聖皇后尊諡于廟改製金表
神主題寫尊諡廟號十二月乙卯親享太廟奉玉冊玉寶
加上太祖聖武皇帝尊諡曰法天啟運廟號太祖光獻皇
后曰翼聖加上睿宗景襄皇帝曰仁聖廟號睿宗莊聖皇
后曰顯懿其舊制金表神主以櫝貯兩旁自是主皆範金
作之如金表之製延祐七年仁宗升祔增置廟室太常禮
儀院下博士檢討歷代典故移書禮部中書集議曰古者
天子祭七代兄弟同爲一代廟室皆有神主禮合增置廟
室又議大行皇帝升祔太廟七室皆有神主增室不及依

前代典故權於廟內止設幄座面南安奉今相視得第七
室近南對室地位東西丈有五尺除設幄座外餘五尺不
妨行禮乃結綵爲殿置武宗室南權奉神主十月戊子英
宗將以四時躬祀太廟命太常禮官與中書翰林集賢等
官集議其禮制曰此追遠報本之道毋以朕勞而有所損
其一遵典禮丙寅中書以躬謝太廟儀注進十一月丙子
朔帝御齋宮丁丑備法駕儀衛躬謝太廟至櫺星門駕止
有司進輦不御步至大次服袞冕端拱以俟禮儀使請署
祝帝降御座正立書名及讀祝敕高贊御名至仁宗室輒
歔欬流涕左右莫不感動退至西神門殿中監受圭出降
沒階乃授甲辰太常進時享太廟儀式至治元年正月乙
酉始命於太廟垣西北建大次殿丙戌始以四孟月時享

親祀太室禮成坐大次謂羣臣曰朕纘承祖宗不緒夙夜
祇栗無以報稱歲惟四祀使人代之不能致如在之誠實
所未安自今以始歲必親祀以終朕身五月中書省臣言
以廟制事集御史臺翰林院太常院臣議謹按前代廟室
多寡不同晉則兄弟同爲一室正室增爲十四閒東西各
一閒唐九廟後增爲十一室宋增室至十八東西夾室各
一閒以藏祧主今太廟雖分八室然兄弟爲世止六世而
已世祖所建前廟後寢往歲寢殿災請以今殿爲寢別作
前廟十五閒中三閒通爲一室以奉太祖神主餘以次爲
室庶幾情文得宜謹上太常廟制制曰善期以來歲營之
二年春正月丁丑始陳鹵簿親享太廟三月以新作太廟
正殿夏秋二祭權止秋八月丙辰太皇太后崩太常院官

奏國哀以日易月旬有二日外乃舉祀事有司以十月戊
辰有事於太廟取聖裁制曰太廟禮不可廢迎香去樂可
也又言太廟興工未畢有妨陳宮縣樂請止用登歌從之
三年春三月戊申祔昭獻元聖皇后於順宗室夏四月六
日詔議太廟夾室制度諸博士議太廟十五閒南北六閒
東西兩頭二閒請準唐南北三閒之制壘至棟爲三閒壁
以紅泥以準東西序南向爲門如今室戶之制虛前以準
廂所謂夾室前堂也雖未盡合於古於今事爲宜六月上
都中書省以聞詔從之秋七月辛卯太廟落成俄國有大
故晉王卽皇帝位十二月戊辰追尊皇考晉王爲皇帝廟
號顯宗皇妣晉王妃爲皇后庚午盜入太廟失仁宗帝后
神主壬申重作仁廟二金主丙午御史趙成慶言太廟失

神主乃古今莫大之變由太常禮官不恭厥職宜正其罪以謝宗廟神靈制命中書定罪泰定元年春正月甲午奉安仁宗帝后二神主丁丑御史宋本趙成慶李嘉賓言太廟失神主已命中書定太常失守之罪中書以爲事在太廟署令而太常官屬居位如故昔唐陵廟皆隸宗王盜研景陵門戟架旣貶陵令丞而宗正卿亦皆貶黜且神門戟架比之太廟神主孰爲輕重宜定其罪名顯示黜罰以懲不恪不報先是博士劉致建議曰竊以禮莫大於宗廟宗廟者天下國家之本禮樂刑政之所自出也唐虞三代而下靡不由之聖元龍興朔陲積德累功百有餘年而宗廟未有一定之制方聖天子繼統之初定一代不刊之典爲萬世法程正在今日周制天子七廟三昭三穆昭處於東

穆處於西所以別父子親疏之序而使不亂也聖朝取唐宋之制定爲九世遂以舊廟八室而爲六世昭穆不分父子竝坐不合禮經新廟之制十五間東西二閒爲夾室太祖室旣居中則唐宋之制不可依惟當以昭穆列之父爲昭子爲穆則睿宗當居太祖之東爲昭之第一世世祖居西爲穆之第一世裕宗居東爲昭之第二世兄弟共爲一世則成宗順宗顯宗三室皆當居西爲穆之第二世武宗仁宗二室皆當居東爲昭之第三世昭之后居左穆之后居右西以左爲上東以右爲上也苟或如此則昭穆分明秩然有序不違禮經可爲萬世法若以累朝定制依室次於新廟遷安則顯宗躋順宗之上順宗躋成宗之上以禮言之春秋閔公無子庶兄僖公代立其子文公遂躋僖公

於閔公之上史稱逆祀及定公正其序書曰從事先公然
僖公猶是有位之君尚不可居故君之上況未嘗正位者
乎國家雖曰以右爲尊然古人所尙或左或右初無定制
古人右社稷而左宗廟國家宗廟亦居東方豈有建宗廟
之方位旣依禮經而宗廟之昭穆反不應禮經乎且如今
朝賀或祭祀宰相獻官分班而立居西則尙左居東則尙
右及行禮就位則西者復尙右東者復尙左矣事大體重
宜從使院移書集議取旨四月辛巳中書省臣言始祖皇
帝始建太廟太祖皇帝居中南向睿宗世祖裕宗神主以
次附西室順宗成宗武宗仁宗以次附東室邇者集賢翰
林太常諸臣言國朝建太廟遵古制古尙左今尊者居右
爲少屈非所以示後世太祖皇帝居中南向宜奉睿宗皇

帝神主附左一室世祖附右一室裕宗附睿宗室之左顯
宗順宗成宗兄弟也以次附世祖室之右武宗仁宗亦兄
弟也以附裕宗室之左英宗附成宗室之右臣等以其議
近是謹繪室次爲圖以獻詔從之五月戊戌附顯宗英宗
凡十室四年夏四月辛未盜入太廟失武宗神位及祭器
壬申重作武宗金主及祭器甲午奉安武宗神主天麻元
年冬十月丁亥毀顯宗室順帝重改至元之六年六月詔
毀文宗室此有元一代宗廟之本末因革也凡大祭祀尤
貴馬湏將有事敕太僕司捫馬官奉尙飲者革囊盛送焉
其馬牲旣與三牲同俎而割奠之饌復與籩豆俱設將奠
牲盤酌馬湏則蒙古大祝升詣第一座呼帝后神諱以致
祭年月日數牲齊品物致其祝語以次詣列室皆如之禮

畢則以割奠之餘撒於南櫺星門外名曰撒茶飯蓋蒙古本俗所重也割奠之禮初惟太常卿設之至元間桑葛爲初獻乃有三獻等官同設之儀博士議曰凡陳設祭品實罇罍等事獻官皆不與也獨此親設之然後再升殿恐非誠懇專一之道且大禮使等官尤非其職大樂署長言割奠之禮宜別撰樂章博士議曰三獻之禮實依古制若割肉奠葡萄酒馬湏別撰樂章是又成一獻也又議燔膾臠與今燒飯禮合不可廢形鹽糗餌粉資醢餗餗非古雷鼓路鼓與播鼗之制不同攝祀大禮使終夕堅立無其義知禮者皆有取於其言英宗之初博士又言今冬祭卽烝也天子親裸太室功臣宜配享事亦弗果行

宗廟之制世祖至元十七年肇造於大都前廟後寢正殿

元史卷七十八志

禮

十四

東西七間南北五間內分七室殿陛二成三階中曰泰階西曰西階東曰阼階寢殿東西五間南北三間環以宮城四隅重屋號角樓正南正東正西宮門三門各五門皆號神門殿下道直東西神門曰橫街直南門曰通街甃之通街兩旁井二皆覆以亭宮城外繚以崇垣饌幕殿七間在宮城南門之東南向齊班廳五間在宮城之東南西向省饌殿一間在東城東門少北南向初獻齋室在宮城之東東垣門內少北西向其南爲亞終獻司徒大禮使助奠七祀獻官等齋室皆西向雅樂庫在宮城西南東向法物庫儀鸞庫在宮城之東北皆南向都監局在其東少南西向東垣之內環築牆垣爲別院內神廚局五間在北南向井在神廚之東北有亭酒庫三間在井亭南西向祠祭局三

間對神廚局北向院門西向百官廚五間在神廚院南西
向宮城之南復爲門與中神門相直左右連屋六十餘間
東掩齊班廳西直雅樂庫爲諸執事齋房築崇墉以環其
外東西南開櫺星門三門外馳道抵齊化門之通衢初世
祖建宗廟於京師至仁宗崩七廟已滿乃結綺爲室以祔
暨英宗至治元年親行祫享之禮始詔議增廣廟制三年
別建大殿十有五間於今廟前用今廟爲寢殿中三間通
爲一室餘十間各爲一室東西兩旁際牆各畱一間爲夾
室室皆東西橫闊二丈南北入深六間每間二丈宮城南
展後鑿新井二於殿南作亭東南隅西南隅角樓南神門
東西神門饌幕殿省饌殿獻官百執事齋室中南門齊班
廳雅樂庫神廚祠祭等局皆南徙建大次殿三間於宮城
之西北東西櫺星門亦南徙東西櫺星門之內鹵簿房四
所通五十間

元史卷七十八志

禮

十五

楊奐與姚樞書曰聞新築祠堂石室在正位殆沿文
公家禮在北架之誤於古實無據也經止言五廟七
廟而作室次第無明文朱子中庸或問亦止論昭穆
位次而於神主石室皆未之及家禮所載神主之式
亦非奠入汴梁所見宮室廟社法度也嘗於長安慈
恩寺之西南見唐杜岐公家廟凡石室並在西壁高
齊胛臆土人稱爲藏書龕其古廟制天子與諸侯卿
大夫同所異者名數也金汴梁廟制敝家具有圖說
已亥春有告隱匿官粟者親入倉檢視其倉卽太廟
也石室在西壁正殿凡二十五間始祖室三間內祔
祧廟神主五位其石室皆在西壁而近南廡世祖二
間內祔肅宗一位穆宗二間計十六間其神主石室並
下至宣宗各二間係八室計內祔康宗一位太宗並
在西壁東西夾室各二間凡有神主處每間一門一
廡門在左廡在右已上共二十五間近有毛正卿者
至自冬時行禮而未見春夏以其止見虎席故知在
秋冬若春夏則以桃枝席也又其所見虎席是時
享而未及禘祫以禘祫則太祖神主位於榻下而東
向焉昭在北而南向穆在南而北向今其所言太祖

神主在門之內南向焉故知不及禘祫也右見元文類

神主至元三年始命太保劉秉忠攷古制爲之高尺有二寸上頂圓徑二寸八分四廂合刻寸有一分上下四方穿中央通孔徑九分以光漆題尊諡於背上匱跌底蓋俱方底自下而上蓋從上而下底齊跌方尺厚三寸皆準元祐古尺圖主及匱跌皆用栗木匱跌竝用玄漆設祔室以安奉帝主用曲几黃羅帕覆之后主用直几紅羅帕覆之祔室每室紅錦厚褥一紫錦薄褥一黃羅複帳一龜背紅簾一緣以黃羅帶飾六年十二月國師奉旨造木質金表牌位十有六亦號神主設大榻金椅位置祔室前帝位於右后位於左題號其面籠以銷金絳紗其制如櫝

元史卷七十八

志

禮

十六

絨條面用膠粉塗飾背飾以絳金綺藏以枅木縷金雲龍匣塗金鎖鑰韜以紅錦囊蒙以銷金雲龍絳羅複擬撰祝文書祝讀祝皆翰林詞臣掌之至大二年親祀竹冊長尺有二寸廣寸有二分厚三分至治二年正月親祀竹冊八副每冊二十有四簡長尺有一寸廣寸厚一分有二釐祝版攝祀用之制以楸木長二尺四寸廣尺有二寸厚一分其面背飾以精潔楮紙祝文至元時享於太祖室稱孝孫嗣皇帝臣某睿宗室稱孝子嗣皇帝臣某天厯時享自太祖至裕宗四室皆稱孝曾孫嗣皇帝臣某順宗室稱孝孫嗣皇帝臣某成宗至英宗三室皆稱嗣皇帝臣某武宗室稱孝子嗣皇帝臣某幣以白繒爲之每段長丈有八尺

牲齊庶品大祀馬一用色純者有副牛一其角握其色赤

有副凡馬牛羊豕鹿牲體每室七盤單室五盤大羹每室
三登和羹每室三鉶籩之實每室十有二品豆之實每室
十有二品凡祀先期命貴臣率獵師取鮮獐鹿兔以供脯
醢醢醢稻粱爲飯每室二簋黍稷爲飯每室二簋彝尊之
實每室十有一明水玄酒用陰鑑取水於月與井水同鬯
用鬱金爲之五齊三酒醞於光祿寺臍膾蕭蒿至元十八
年五月弗用後遂廢茅香以縮酒至元十七年始用沅州
麻陽縣包茅天鵝野馬塔刺不花其狀如鴉野鷄鶴黃羊胡寨
鳥如鳩漣乳葡萄酒以蒙古本俗割奠皆列室用之羊一
豕一邊之實二粟鹿脯豆之實二菁菹鹿麇簋之實黍簋
之實稷爵尊之實酒皆七祀位各用之薦新鮪野彘孟春
用之鴈天鵝仲春用之葑韭鴨鷄卵季春用之冰羔羊孟

元史卷七十八志

禮

七

夏用之櫻桃竹筍蒲筍羊仲夏用之瓜豚大麥飯小麥麪
季夏用之雛雞孟秋用之菱芡栗黃鼠仲秋用之梨棗黍
梁鷲老季秋用之芝麻兔鹿稻米飯孟冬用之麇野馬仲
冬用之鯉黃羊塔刺不花季冬用之至大元年春正月皇
太子言薦新增用影堂品物羊羔炙魚饅頭饌子西域湯
餅園米粥沙糖飯羹每月用以配薦

神御殿

神御殿皆設於佛寺所奉祖宗御容皆織錦綺爲之其歲
時薦祀視宗廟尤隆重世祖帝后大聖壽萬安寺裕宗帝
后亦在焉順宗帝后大晉慶寺仁宗帝后亦在焉成宗帝
后大天壽萬寧寺武宗及二后大崇恩福元寺爲東西二
殿明宗帝后大天源延聖寺英宗帝后大永福寺耶可皇

后大護國仁王寺世祖武宗影堂皆藏玉冊十有二牒玉寶一鈕仁宗影堂藏皇太子玉冊十有二牒皇后玉冊十有二牒玉寶一鈕英宗影堂藏皇帝玉冊十有二牒玉寶一鈕皇太子玉冊十有二牒凡帝后冊寶以匣置金鎖鑰藏於太廟此蓋其別置者其祭器則黃金餅尊盤盃之屬以十數黃金塗銀香合椀櫟之屬以百數銀壺釜杯匱之屬稱是玉器水晶瑪瑙之器爲數不同有玻璃瓶琥珀勺世祖影堂有眞珠簾又皆有珊瑚樹碧甸子山之屬其祭之日常祭每月初一日初八日十五日二十三日節祭元日清明糴賓重陽冬至忌辰其祭物常祭以蔬果節祭忌辰用牲祭官便服行三獻禮加薦用羊羔炙魚饅頭饌子西域湯餅鬪米粥沙糖飯羹秦定二年亦作顯宗影堂於

大天源延聖寺天祿元年廢舊有崇福殊祥二院奉影堂祀事乃改爲奉禧院二年又改爲太禧宗禋院旣而復以祖宗所御殿尙稱影堂更號神御殿殿皆製名以冠之世祖曰元壽昭睿順聖皇后曰睿壽南必皇后曰懿壽裕宗曰明壽成宗曰廣壽順宗曰衍壽武宗曰仁壽文獻昭聖皇后曰昭壽仁宗曰文壽英宗曰宣壽明宗曰景壽且命學士擬其祭祀儀注今闕又有玉華宮孝思殿在眞定世祖所立以忌日享祀太上皇皇太后御容本路官吏祭奠太常博士按宋會要定其儀仁宗皇慶二年秋八月庚辰命大司徒田忠良詣眞定致祭依歲例給御香酒并犧牲祭物錢中統鈔百錠延祐四年始用登歌樂行三獻禮七年太常博士言影堂用太常禮樂非是制罷之歲時本處

依舊禮致祭其太祖太宗睿宗御容在翰林者至元十五年命承旨和禮霍孫寫太祖御容十六年二月復命寫太上皇御容與太宗舊御容俱置翰林院院官春秋致祭二十四年二月翰林院言舊院屋敝新院屋纔六間三朝御容宜安奉太常寺後仍遷新院至大四年翰林院移署舊尚書省有旨月祭中書平章完澤等言祭祀非小事太廟歲一祭執事諸臣受戒誓三日乃行事今此輕易非宜舊置翰林院御容春秋二祭不必增益制曰可至治三年遷置普慶寺祀禮廢泰定二年八月中書省臣言當祭如故乃命承旨幹赤齋香酒至大都同省臣祭於寺四年造影堂於石佛寺未及遷至順元年七月卽普慶寺祭如故事二年復祀於翰林國史院後至元六年翰林院言三朝御容祭所甚隘兼歲久屋漏於石佛寺新影堂奉安爲宜中書省臣奏此世祖定制當仍其舊制可

元史卷七十八志 禮

九

蒙古本俗舊禮每歲大廟四祭用司禮監官一員命蒙古巫祝當省牲時法服同三獻官升殿詣室戶告牘還至牲所以蒙古語呼累朝帝后名諱而告之明旦三獻禮畢獻官御史太常卿博士復升殿分詣各室蒙古博爾赤跪割牲太僕卿以朱漆盂奉馬乳酌奠巫祝以蒙古語告神訖大祝奉祝幣詣燎位獻官以下復版位載拜禮畢

每歲駕幸上都以八月二十四日祭祀謂之灑馬孛用馬一羯羊八綵段練絹各九匹以白羊毛纏若穗者九貂鼠皮三命蒙古巫覡及蒙古漢人秀才達官四員領其事再拜告天又呼太祖成吉思御名而祝之曰託天皇帝福蔭

年年祭賽者禮畢掌祭官四員各以祭幣表裏一與之餘幣及祭物則凡與祭者共分之

每歲九月內及十二月十六日以後於燒飯院中用馬一羊三馬漣酒醴紅織金幣及裏絹各三匹命蒙古達官一員偕蒙古巫覡掘地爲坎以燎肉仍以酒醴馬漣雜燒之巫覡以蒙古語呼累朝御名而祭焉

每歲十二月下旬擇日於西鎮國寺內牆下灑掃平地太府監供綵幣中尙監供細氈鍼線武備寺供弓箭環刀束稗草爲人形一爲狗一剪雜毛綵段爲之腸胃選達官世家之貴重者交射之非別速札刺爾乃滿芒古台列班塔達珊竹雪泥等氏族不得與列射至糜爛以羊酒祭之祭畢帝后及太子嬪妃併射者各改所服衣俾蒙古巫覡視

元史卷七十八志

禮

三

讚之祝讚畢遂以與之名曰脫災蒙古本俗謂之射草狗每歲十二月十六日以後選日用白羊毛爲線帝后及太子自頂至手足皆用羊毛線纏繫之坐於寢殿蒙古巫覡念呪語奉銀槽貯火置米糠其中沃以酥油以其煙薰帝之身斷所繫毛線納諸槽內又以紅帛長數寸帝手裂碎之唾之者三併投火中卽解所服衣帽付巫覡謂之脫舊災迎新福云

陵寢

韓爾朵帳殿

舊制凡宮車晏駕棺用香柅木中分爲二刳若人形其廣狹長短僅足容身斂用貂襖皮帽及鞞鞵繫腰盒鉢俱用白粉皮爲之殉以金壺瓶二盞一椀楪匙箸各一斂訖用黃金籬四條束之輿車用白氈青緣納什什爲簾覆棺亦

以納什什爲之納什什者綴小珠於金錦也前行用蒙古
巫嫗一人衣新衣騎馬牽馬一匹以黃金飾鞍轡籠以納
什什謂之金靈馬每日三次用羊奠祭至所葬陵地其開
穴所取之土成塊排列棺旣下復依次掩覆之如有餘土
則遠置他所送葬官三員居五里外日一次燒飯致祭三
年然後返葉子奇草木子曰歷代送終之禮至始皇而極
侈至窮天下之力以崇山墳傾天下之財以充藏槨盡後
宮之女以殉埋葬墳土未乾已遭掘燒漢世人主自文帝
霸陵瓦棺斂制外餘帝皆歲用上供財賦之半以爲陵寢
之費沿及唐宋皆盛殉埋其後變亂多遭發掘非徒無益
而有害焉元制香木二片爲棺鑿空其中以納遺體加髹
漆畢以黃金爲圈三圈定送至直北園寢之地深坎之而

元史卷七十八志

禮

三

後萬馬蹶平俟草青方解嚴則已漫同平坡無復封識遺
跡永無發掘暴露誠有合於上古不封不樹之典跨越漢
唐者矣惟其葬地則舊史本紀止言葬起輦谷一統志但
言起輦谷在塞外張鵬翻使俄羅斯日記則言過歸化城
西北數十里有祁連山有宮殿黃琉璃瓦蓋元代帝陵固
疑起輦卽祁連山之譌是時常熟錢良策以司員從行其
出塞紀略則曰陰山之麓十餘里山坳有大墳周圍以城
圓其頂若橋梁中爲方亭亭中爲大冢建屋覆碧琉璃瓦
殆王者陵寢而不言何代此一說也

錢氏但言陰山不言是祁連山蓋不欲隨

同附也錢唐馮一鵬塞外雜識則云元太祖陵在河套中間

不封不殖深埋於地下葬後放馬十萬匹馳驟踐平及草
長無迹然後去之其部落分六旗號鄂爾多斯卽元史之

幹爾朵華言大帳殿也河套之中有穹廬十座乃蒙古諸王奉元太祖春秋享祀之所至今蒙古過此皆下馬四十八家各遣本支官屬守之此又一說也蒙古源流小徹辰薩囊台吉撰則曰青吉思汗病終後於阿勒坦山陰哈岱山陽之大

鄂特地方建陵寢立白室八間號爲索多博克達青吉思汗第三子鄂德格依畱守汗位屢傳至順帝亡國仍還漢北蒙古四十萬眾惟脫去六萬於克魯倫河造城分所部爲左右翼翼三萬人屢傳至插汗小王子始徙漠南而達延汗畱漠北收左右翼之眾於祖汗之八白室前卽汗號其季子生七孫爲喀爾喀七博羅特汗其十一子爲漠南九部汗其九部汗內有巴爾斯博羅特子七人長子哀必里克墨爾招據鄂爾多斯部爲其祖守八白室之人領右

元史卷七十八志禮

翼三萬眾次子阿勒坦汗卽俺荅領左翼三萬眾尤強於諸部此又一說也阿勒坦山卽阿爾台山也案元太祖終於漠北葬於漠北其八白室卽在阿爾泰山之陰則元諸帝所葬之起輦谷均在阿爾泰山矣且明有陵寢有廟室非無陵無廟之帳殿又明矣不知何以至明中葉漠南河套之鄂爾多斯部又自稱爲守祖汗八白室之人殊不可解竊意鄂爾多斯旣以幹爾朵大帳殿得名必是明中葉時奉太祖帳殿遷於漠南後世旣以此名其部遂尊之與八白室等而竝附會爲祖陵所在正猶堯陵有四舜陵有二蓋元代每一帝晏駕則其帳殿世世尊奉同於神御故元史叛王海都侵和林掠憲宗帳殿去及王師討之始復奪回蒙古源流始述太祖陵廟甚確及後段敘鄂爾多斯部語未分明

遂滋後人之疑又攷迺賢金臺集云元代后妃太子陵墓皆在獨石口外氈帽山是諸帝陵外其后妃王主無盡歸漠北起輦谷之理今塞外漠南往往有元代陵制其以是夫

元代宮殿之外別有帳殿名斡爾朵金碧輝煌層層結構櫻毳與錦繡相錯高敞旃幪可庇千人每帳殿所費鉅萬一帝棄世則以此帳屬后妃守之或二后共守一帳嗣後子孫世有守帳之人和林太祖四大帳殿及太宗帳殿中葉尚存是其明證每新君立復別置帳殿帝帝皆然其糜費更在宮室之上宮殿可百年輪奐而帳殿則屢朝屢易也此外又有外氈帳房者規制較小凡后妃妊身將及月辰則出居於外氈帳房生子彌月後復遷內寢而以其帳

元史卷七十八

志

禮

三

房賜左右近臣凡帝后有疾危殆度不起亦移居外氈帳房有不測則殯斂其中其帳房亦以賜近臣此皆在斡爾朵大帳殿之外大帳殿每帝止一座身後則后妃守之不可以賜臣下者也四大帳殿惟太祖有之其餘各帝惟一帳殿舊史絕不提及又與氈帳房不加分析故辯而補之

壇廟羣神各祀

一曰太社太稷至元七年十二月有詔歲祀太社太稷三十年正月始用御史中丞崔彧言於和義門內少南得地四十畝爲壇垣近南爲二壇壇高五丈方廣如之社東稷西相去約五丈制度儀節同唐宋

二曰先農之祀始自至元九年二月命祭先農如祭社之儀十四年二月戊辰祀先農東郊十五年二月戊午祀先

農以蒙古胄子代耕籍田二十一年二月丁亥又命翰林學士承旨撒里蠻祀先農於籍田武宗至大三年夏四月從大司農請建農蠶二壇博士議二壇之式與社稷同縱廣十步高五尺四出陞外壇相去二十五步每方有樛星門今先農先蠶壇位在籍田內若立外壇恐妨千畝其外壇勿築是歲命祀先農如社稷禮樂用登歌日用仲春上丁後或用上辛或甲日行禮儀節同唐宋先蠶之祀未聞三日宣聖廟太祖始置於燕京至元十年三月命中書省春秋釋奠執事官各公服如其品陪位諸儒襴帶唐巾行禮成宗始命建宣聖廟於京師大德十年秋廟成十一年秋七月詔加號先聖曰大成至聖文宣王延祐三年秋七月詔春秋釋奠於先聖以顏子曾子子思孟子配享封孟

元史卷七十八 志 禮

五

子父爲邾國公母爲邾國宣獻夫人先是皇慶二年以先儒周惇頤程顥程頤張載邵雍司馬光朱熹張栻呂祖謙從祀又以許衡從祀至順元年以漢儒董仲舒從祀加封齊國公叔梁紇啟聖王魯國太夫人顏氏啟聖王夫人顏子克國復聖公曾子邾國宗聖公子思沂國述聖公孟子鄒國亞聖公河南伯程顥豫國公伊陽伯程頤洛國公祭祀禮儀同宋金

至楊時李侗胡安國蔡沈真德秀五人元時未嘗從祀止因胡瑜之請各給封號而舊制以五賢從祀標目實爲舛疏今刪之其闕里之廟始自太宗九年令先聖

五十一代孫襲爵衍聖公元措修之官給其費而代祠之禮則始於武宗牲用大牢禮物別給白金百五十兩綵幣表裏各十有三匹四年冬復遣祭酒劉賡往祀牲禮如舊延祐之末秦定天庥初載皆循是典錦幣雜綵有加焉其

郡縣宣聖之廟中統二年夏六月詔郡縣所在學宮及書院有司歲時致祭月朔釋奠成宗卽位詔曲阜林廟上都大都諸路府州縣邑廟學書院贍學土地及貢十莊以供春秋二丁朔望祭祀修完廟宇自是天下郡邑廟學無不完葺釋奠悉如舊儀至其學校祀典化民造士之意能道其本末源流穆然深遠者惟柳貫處州新修廟學一篇謹錄其銘詩以訓多士詩曰若古範民有庠有序閭塾所升進旅退旅飲射讀法於焉廬語還從父師講道肄德事親信友動言維則及夫興賢自鄉而國致用於時爲大夫士亦祇六德亦和三事由仁義行非行仁義庠以養賢序以序射士出於農學須其暇越鄉而游則眾所舍凡學之成民用丕變少能代老耕則讓畔明君諡辟視爲勝算魯嘗

修泮鄭不廢校來歌來議胥訓胥誥二國之政卒以無暴巍巍聖師宜有廟樂唐始潔祠宋因建學邊豆孔嘉笙鏞間作夫是秩禮亦承於古誓師之制殷薦樂祖周公於周孔子於魯矧是國中聖維教父首善自京刑於郡邑教行自舉洋洋秩秩元運重光赫如天日率土有截尙用儒術明詔屢頒申嚴甲令憲臣宣風良牧蒞政吉調苾芬式時誦詠育彼菁莪洽于休盛山區海陬凡有官守絜是夷風化爲禮囿括維東藩千里而褻俗鮮淫昏民重孝秀建學立師絜教之始孰爲新宮鄴侯氏李在宋孫黃亦濟其美支傾柱敗閒閱五紀撓棟彫簷日就於下爰起新宮以竣賢者盧侯至止有嘖悲咤微匠以傭掄材於野有奕使華翩其來屆嘉侯是舉勉以弗懈介爾高明廓爾湫隘凡厥

禮容有隆無殺問財焉出逋租是輯咨爾元僚制其張翕
廣庭閑閑窮棟岌岌自門徂堂爾營爾葺無侈前人無廢
舊觀業有息游祭有薦盥謹爾遁思合爾泮渙經訓昭垂
日星與煥挾策而趨重席而坐勉勉師生矯輕警惰如彼
執御逐左而左如彼稽田是蕃是播惟二李公前承後引
異世相望肆不隕問惠我括民知遠之近式訓程之視公
繩準顯允虛侯職是南伯起孝起敬民用飲食僚有王君
婉其諾畫載新泮宮崇乞仡神道設教天維顯用民罔
敢知惟日康共春則俟相輿則成誦矢詩颺之聲於有眾
四曰岳鎮海瀆代祀自中統二年始凡二十九處分五道
後乃以東嶽東海東鎮北鎮爲東道中嶽淮瀆濟瀆北海
南嶽南海南鎮爲南道北嶽西嶽后土河瀆中鎮西海西

元史卷七十八

志 禮

五

鎮西瀆爲西道旣而又以驛騎迂遠復爲五道道遣使二
人集賢院奏遣漢官翰林院奏遣蒙古官出璽書給驛以
行中統初遣道士或副以漢官至元二十八年正月帝謂
中書省臣曰五嶽四瀆祀事朕以道遠不能親往宜遣重
臣代朕祀之漢人選名儒及道士習祀事者其禮物則每
處歲祀銀香合一重二十五兩五嶽組金幡二鈔五百貫
四瀆織金幡二鈔二百五十貫四海五鎮銷金幡二鈔二
百五十貫至則守臣奉詔使行禮皇帝登寶位遣官致祭
降香幡合如前禮惟各加銀五十兩五嶽各中統鈔五百
貫四瀆四海五鎮各中統鈔二百五十貫或他有禱禮亦
如之其封號至元二十八年春二月加上東嶽爲天齊大
生仁聖帝南嶽司天大化昭聖帝西嶽金天大利順聖帝

北嶽安天大貞玄聖帝中嶽中天大寧崇聖帝加封江瀆
爲廣源順濟王河瀆靈源宏濟王淮瀆長源溥濟王濟瀆
清源善濟王東海廣德靈會王南海廣利靈孚王西海廣
潤靈通王北海廣澤靈祐王成宗大德二年二月加封東
鎮沂山爲元德東安王南鎮會稽山爲昭德順應王西鎮
吳山爲成德永靖王北鎮醫巫閭山爲貞德廣寧王中鎮
霍山爲崇德應靈王敕有司歲時與嶽瀆同祀

五曰郡縣社稷至元十年八月甲辰朔頒諸路立社稷壇
墼儀式十六年春三月中書省下太常禮官定郡縣社稷
壇墼祭器制度祭祀儀式圖寫成書名至元州郡通禮元
貞二年冬復下太常議置壇於城西南二壇方廣視太社
太稷殺其半壺尊二邊豆皆八而無樂牲用羊豕餘皆與

元史卷七十八志

禮

七

太社太稷同三獻官以州長貳爲之

六曰郡縣三皇廟元貞元年初命郡縣通祀三皇如宣聖
釋奠禮大皞伏羲氏以句芒氏之神配炎帝神農氏以祝
融氏之神配軒轅黃帝氏以風后氏力牧氏之神配黃帝
臣兪跗以下十人姓名載於醫書者從祀兩廡有司歲春
秋二季行事而以醫師主之竝制三皇廟祀樂章今不備

錄

七曰嶽鎮海瀆常祀至元三年定各路守土官歲祀嶽鎮
海瀆之制正月東嶽鎮海瀆土王日祀泰山於泰安州沂
山於益都府界立春日祀東海於萊州界大淮於唐州界
三月南嶽鎮海瀆立夏日遙祭衡山土王日遙祭會稽山
皆於河南府界立夏日遙祭南海大江於萊州界六月中

嶽鎮土王日記嵩山於河南府界霍山於平陽府界七月
西嶽鎮海瀆土王日記華山於華州界吳山於隴縣界立
秋日遙祭西海大河於河中府界十月北嶽鎮海瀆土王
日記恆山於曲陽縣界醫巫閭於遼陽廣寧路界立冬日
遙祭北海於登州界濟瀆於濟源縣祀官以所在守土有
司爲之既有江南乃罷遙祭

八日風雨雷師之祀自至元七年十二月大司農請於立
春後丑日祭風師於東北郊立夏後申日祭雷雨師於西
南郊仁宗延祐五年乃卽二郊定立壇壝之制其儀注闕
九日武成王廟祀周太公也廟在樞密院公堂之西以孫
武子張良管仲樂毅諸葛亮以下十人從祀每歲春秋仲
月上戊以羊一豕一樞密院遣官行三獻禮

元史卷七十八

志禮

天

十曰古帝王廟元惟三皇廟通祀於郡縣其帝王以下則
郡縣不徧立帝堯廟在平陽帝舜廟河東山東濟南歷山
濮州湖南道州皆有之大禹廟在河中龍門至元元年七
月龍門禹廟成命侍臣持香致敬有祝文十二年二月立
伏羲女媧舜湯等廟於河中解州洪洞趙城十五年四月
修會川縣盤古王祠祀之二十四年閏二月敕春秋二仲
丙日祀帝堯廟致和元年禮部移太常送博士議舜禹之
廟合依堯祠故事每歲春秋仲月上旬卜日致祭官給祭
物至順元年三月從太常奉禮郎薛元德言彰德路湯陰
縣北故羗里城周文王祠命有司奉祀

十一曰周公廟在鳳翔府岐山之陽天祿二年六月以岐
陽廟爲岐陽書院設學官春秋釋奠周文憲王如孔子廟

儀凡有司致祭先代聖君名臣皆有牲無樂

十二曰凡名山大川忠臣義士在祀典者所在有司主之
惟南宋時所封南海女神靈惠夫人至元中以護海運有
靈加封南海明著天妃其後大德天祿至正中屢加封號
積至十二字曰輔國護聖庇民廣濟福惠明著天妃直沽
平江周涇泉福興化等處皆有廟皇慶以來歲遣使齋香
及金幡徧祭焉

十三曰功臣之祀惟故淮安忠武王立廟於杭春秋二仲
月次戊祀以少牢用邊豆簠簋行酌獻禮若魏國文正公
許衡廟在大名順德忠獻王哈刺哈孫廟在順德武昌者
皆歲時致祭自古帝王而下祭器不用邊豆簠簋儀非酌
奠者有司便服行禮三上香奠酒而已

元史卷七十八志

禮

五

十四曰大臣家廟惟至治初右丞相拜住得立五廟同堂
異室而牲器儀式未聞

冕服

寶璽

其與輅儀仗並沿金宋不復志特志

備攷也

冕服者元起漠外而用中國朝祭之服當存以

秦并天下兼收六國車旗服御窮極侈靡有大駕法駕以
及鹵簿漢承秦後多因其舊由唐及宋亦效秦法未協殷
輅周冕文質之中然華夏之制度存焉遼金中葉朝祭其
袞冕每用漢制元初立國庶事草創冠服車輿並從舊俗
有天子之質孫衣與百官之質孫衣世祖混一天下近取
金宋遠法漢唐至英宗親祀太廟復置鹵簿由是上而天
子之冕服皇太子冠服天子之五輅與腰輿象轎儀衛隊
仗下而百官祭服朝服以及於士庶人之服色粲然具有

章秩然其有序大抵參酌古今隨時損益雖兼存質孫初制而迥非氈裘胡服之舊矣惟志冕服而不及儀仗蓋因襲前代無關沿革故不贅錄惟諸帝本紀天子卽位則必造珠衣此古制所無既非典禮無庸攷辨

天子冕服衮冕制以漆紗上覆曰縹青表朱裏縹之四周以雲龍冠之口圍縹以珍珠縹之前後旒各十二以珍珠爲之縹之左右繫黼纁二繫以玄統承以玉瑱纁色黃絡以珠冠之周圍珠雲龍網結通翠柳調珠縹上橫天河帶一左右至地珠鈿窠網結翠柳朱絲紐二屬諸弁爲纁絡以翠柳調珠簪以玉爲之橫貫於冠 衮龍服制以青羅飾以生色銷金帝星一月一月一昇龍四複身龍四山三十八火四十八華蟲四十八虎雌四十八 裳制以緋

元史卷七十八

志禮

三

羅其狀如裙飾以文繡凡十六行每行藻二粉米一黼二黻二 中單制以白紗絳緣黃勒帛副之 蔽膝制以緋羅有標緋絹爲裏其形如襜袍上著之繡複身龍 玉佩珩一琚一瑀一衝牙一璜二衝牙以繫璜珩下有銀獸面塗以黃金雙璜夾之次又有衝下有衝牙旁別施雙的以鳴用玉 大帶制以緋白二色羅合縫爲之 玉環綬制以納石失金錦也十有三小玉環下有青絲織網 紅羅鞞制以紅羅爲之高鞞 履制以納石失有雙耳二帶鈎飾以珠 鞞制以紅綾

右按太常集禮至元十二年及大德十一年博士竝議

擬冕旒衮衣裳帶履舄之制惟祭天地宗廟受冊尊號

元日受朝冊皇太子則服之事未果行至延祐七年七

月英宗命省臣與太常禮儀院速製法服八月中書省會集翰林集賢太常禮儀院官講議依祕書監所藏前代帝王袞冕法服圖本命有司製如其式順帝至元六年仲冬皇帝親祀太廟期迫册製袞冕猝不及辦適有英廟元製一副未經用者見存皆以舊物爲不立而阻之惟學士楊瑀與歐陽玄同解之曰若以舊物爲不立則玉璽宮殿龍牀皆未嘗更易何獨以此爲忌也眾議遂息用其舊者

楊瑀山居新語

鎮圭制以玉長一尺二寸有袋副之

皇太子冠服袞冕玄衣纁裳中單蔽膝玉佩大綬朱襪赤舄

按太常集禮至元十二年大德十一年博士議擬皇太

元史卷七十八

志禮

三

子冕服之制加元服從祀受冊謁廟朝會服之已擬其制未果造故不復載

三獻官及司徒大禮使祭服籠巾貂蟬冠五青羅服五

襖俱用

紅羅裙五

阜綾

紅羅蔽膝五

其羅花樣俱係牡丹

白紗中單

阜綾

紅組金綬紳五

紅組金譯語言納

五玉佩五白羅方心曲領五赤革履五對白綾鞵五對

助奠以下諸執事官冠貂蟬冠獬豸冠七梁冠六梁冠

五梁冠四梁冠三梁冠二梁冠二百青羅服二百

領袖襖

紅綾裙二百

阜綾

紅羅蔽膝二百紫羅公服二百

俱用阜

白紗中單二百

爲襖

織金綬紳二百

紅一百九十八

青羅

束帶二百白羅方心曲領二百銅佩二百展角幘頭二百

塗金荔枝帶三十烏角帶一百七十阜鞵二百對赤革履

二百對白綾鞵二百對象笏三十銀杏木笏百有七十
凡獻官諸執事行禮俱衣法服惟監察御史二冠獬豸
服青綬凡迎香讀祝及祀日遇陰雨俱衣紫羅公服六
品以下皆得借紫

都監庫祠祭局儀鸞局神廚局頭目長行人等交角幘頭
五十窄袖紫羅服五十塗金束帶五十阜鞵五十

初憲宗壬子年秋八月祭天於日月山用冕服自此始
成宗大德六年春三月祭天於麗正門外丙地命獻官
以下諸執事各具公服行禮是時大都未有郊壇大禮
用公服自此始九年冬至享祭用冠服依宗廟見用者
制其後節次祭祀或合祀天地增配位從祀獻攝職事
續置冠服於法服庫收掌法服二百九十有九公服二

元史卷七十八 志禮

三

百八十窄紫二百九十有五至大開太常博士李之紹
王天祐疏陳親祀冕無旒服大裘而加袞裘以黑羔皮
爲之臣下從祀冠服歷代所尙其制不同集議得依宗
廟見用冠服制度

社稷祭獻官禮服青羅袍百有二十三白紗中單百有二
十三紅梅花羅裙百有二十三藍織錦銅環綬紳二紅織
錦銅環綬紳百有十七紅織錦玉環綬紳四紅梅花羅蔽
膝百有二十三革履百有二十三白綾鞵百有二十三白
羅方心曲領百有二十三黃綾帶百有二十三佩百有二
十三銅珩璜者百有十九玉珩璜者四藍素貯絲帶百有
二十三銀帶四銅帶百有十九冠百有二十三水角簪金
梁冠百有七紗冠十獬豸冠二籠巾紗冠四木笏百二十

十三紫羅公服百有二十三黑漆幘頭百有二十三展角
全二色羅插領百有二十三鍍金銅荔枝帶十角帶百有
十三象笏十三枝木笏百有十枝黃絹單包複百有二十
三紫紵絲抹口青氍毹百有十三阜鞞百有二十三窄紫
羅衫三十黑漆幘頭三十銅束帶二十黃絹單包複二十
阜鞞三十紫紵絲抹口青氍毹三十

宣聖廟祭獻官禮服七梁冠三簪全鴉青袍三絨錦綬紳三

各帶青絨網并銅環二方心曲領三藍結帶三銅佩三紅羅裙三白

絹中單三紅羅蔽膝二革履三白絹執事儒服軟角唐

巾白襴插領黃鞞角帶阜鞞各九十有八曲阜祭服連

蟬冠四十有三七梁冠三五梁冠三十有六三梁冠四阜

紵絲鞋三十有六緇舒角幘頭二軟角唐巾四十角簪四

元史卷七十八志禮

十有三冠纓四十有三副凡八十有六條象牙笏七木笏三十有

八玉佩七凡十有四繫銅佩三十有六凡七十有七繫帶八十有五藍

鞞帶七紅鞞帶三十有六烏角帶二黃鞞帶烏角偏帶四

十大紅金綬結帶七上用玉環青羅大袖夾衣七紫羅公

服二褐羅大袖衣三十有六白羅衫四十白絹中單三十

有六白紗中單七大紅羅夾蔽膝七大紅夾裳緋紅羅夾

蔽膝三十有六緋紅夾裳四黃羅夾裳三十有六黃羅大

帶七白羅方心曲領七紅羅綬帶七黃絹大帶三十有六

阜鞞白羊毳鞞各四十有二對大紅羅鞋七緇白絹夾鞞

四十有三對

質孫服者漢言一色服也內庭大宴則服之冬夏之服不
同然無定制凡勳戚大臣近侍賜則服之下至樂工衛士

皆有其服精粗之制上下之別雖不同總謂之質孫云

天子質孫冬之服凡十有一等服納石失怯綿里也剪茸則

冠金錦暖帽服大紅桃紅紫藍綠寶里寶里服之有襪者也則冠七

寶重頂冠服紅黃粉皮則冠紅金苔子暖帽服白粉皮則

冠白金苔子暖帽服銀鼠則冠銀鼠暖帽其上竝加銀鼠

比肩俗稱曰轆夏之服凡十有五等服苔納都納石失綴小珠

珠於金錦則冠寶頂金鳳釵笠服速不都納石失於金錦則冠

珠子捲雲冠服納石失則帽亦如之服大紅珠寶里紅毛

子苔納則冠珠緣邊釵笠服白毛子金絲寶里則冠白藤

寶貝帽服駝褐毛子則帽亦如之服大紅綠藍銀褐棗褐

金繡龍五色羅則冠金鳳頂笠各隨其服之色服金龍青

羅則冠金鳳頂漆紗冠服珠子褐七寶珠龍苔子則冠黃

元史卷七十八志禮

牙忽寶貝珠子帶後簷帽服青速夫金絲鬮子速夫回回

也者則冠七寶漆紗帶後簷帽百官質孫冬之服凡九等

大紅納石失一大紅怯綿里一大紅官素一桃紅藍綠官

素各一紫黃鴉青各一夏之服凡十有四等素納石失一

聚線寶里納石失一棗褐渾金閒絲蛤珠一大紅官素帶

寶里一大紅明珠苔子一桃紅藍綠銀褐各一高麗鴉青

雲袖羅一駝褐茜紅白毛子各一鴉青官素帶寶里一

百官公服制以羅大袖盤領俱右衽一品紫大獨科花徑

五寸二品小獨科花徑三寸三品散苔花徑二寸無枝葉

四品五品小雜花徑寸有五分六品七品緋羅小雜花徑

一寸八品九品綠羅無文幞頭漆紗為之展其角笏

制以牙上圓下方或以銀杏木為之偏帶正從一品以

玉或花或素二品以花犀三品四品以黃金爲荔枝五品以下以烏犀並八胯鞞用朱革鞞以阜皮爲之

儀衛服色交角幘頭其制巾後交折其角鳳掖幘頭制

如唐巾兩角上曲而作雲頭兩旁覆以兩金鳳掖學士

帽制如唐巾兩角如匙頭下垂唐巾制如幘頭而摺其

角兩角上曲作雲頭控鶴幘頭制如交角金縷其額

花角幘頭制如控鶴幘頭兩角及額上簇象生雜花錦

帽制以漆紗後幅兩旁拱而高中下後畫連錢錦前額

作聚文平巾幘黑漆革爲之形如進賢冠之籠巾或以

青或以白武弁制以皮加漆甲騎冠制以皮加黑漆

雌黃爲緣抹額制以緋羅繡寶花巾制以絀五色畫

寶相花兜鍪制以皮金塗五色各隨其甲襯甲制如

元史卷七十八志禮

卷

雲肩青錦質緣以白錦衷以氈裏以白絹雲肩制如四

垂雲青緣黃羅五色嵌金爲之兩襜制如衫襯袍制

用緋錦武士所以裼兩襜士卒袍制以絹絀繪寶相花

窄袖袍制以羅或絀辨線襖制如窄油衫腰作辨線

細摺控鶴襖制以青緋二色錦圓荅寶相花窄油襖

長行輿士所服紺緞色樂工襖制以緋錦明珠琵琶窄

袖辨線細摺甲覆膊掩心扞背扞股制以皮或爲虎文

師子文或施金鎧鎖子文臂鞬制以錦綠絹爲裏有雙

帶錦騰蛇束麻長丈有一尺裏以紅錦束帶紅鞞雙

獺尾黃金塗銅胯餘同腰帶而狹小條環制以銅黃金

塗之汗胯制以青錦緣以銀褐錦或繡撲獸閒以雲氣

行滕以絹爲之鞋制以麻鞞鞋制以皮爲履而長

其勒縛於行滕之內 雲頭鞞制以皮幫嵌雲朵頭作雲象鞞束於脛

服色等第仁宗延祐元年所定詔曰先王之禮貴賤有章奢儉中節所以定民志節民用也比年以來士民靡麗相尚尊卑混淆僭禮費財其命中書省定立服色等第頒示天下諸章服惟蒙古人及宿衛之士不在禁限亦不許服龍鳳文龍五爪二角者禁之職官一品二品許服渾金花三品服金荅子四品五品服雲袖帶襴六品七品服六花八品九品服四花職事散官從一高命婦一品至三品服渾金四品五品服金荅子六品以下惟服銷金并金紗荅子首飾一品至三品許用金珠寶玉四品五品用金玉真珠六品以下用金惟耳環用珠玉同籍者不限親疏期親

元史卷七十八志

禮

美

雖別籍并出嫁同車輿竝不得用龍鳳文一品至二品許用閒金裝飾銀螭頭繡帶青幔四品五品用素師頭繡帶青幔六品至九品用素雲頭素帶青幔內外有出身考滿應入流見役人員服用與九品同受各投下令旨鈞旨有印信見任人員亦與九品同庶人惟許服暗花紵絲絲綢綾羅毛毳不許用赭黃帽笠不得飾以金玉鞞不得裁置花樣首飾許用翠花金釵篔各一事惟耳環許用金珠碧甸餘竝用銀車輿黑油齊頭平頂阜幔諸色日人除行營帳外餘竝與庶人同職官致仕與見任同解降者依應得品級不敘者與庶人同父祖有官既歿年深非犯除名不敘其命婦及子孫與見任同諸樂人工藝人等服用與庶人同凡承應裝扮之物不拘上例阜隸公使人惟許服綢

絹倡家出入止服皂背不許乘坐車馬凡服色等第上得兼下下不得僭上違者職官解任期年後降一等餘人笞五十七違禁之物付告者充賞御賜之物不在禁限諸官員以黃金飾甲者禁之違者甲匠同罪諸常人鞍轡畫虎兔者聽畫雲龍犀牛者禁之諸段匹織造周身大龍者禁之胷背小龍者勿禁諸市造鞍轡箭鏃鞞履及諸雜帶用金爲飾者禁之

蟬冠朱衣漢制也幘頭大袍隋制也今用蟬冠朱衣方心曲領玉佩朱履是革隋而用漢也此則公服 紗帽圓領唐服也仕者用之中笠襴衫宋服也巾環襪領金服也帽子繫腰元服也方巾圓領明服也庶民用之 朝服一品二品用犀玉帶大團花紫羅袍三品至五品用金帶紫羅

元史卷七十八志

禮

三

袍六品七品用緋袍八品九品用綠袍皆以羅流外授省劄則用氈褐其幘頭皁鞞自上至下皆同也 官民皆戴帽其簷或員或前員後方或樓子蓋兜鍪之遺制也其髮或辮或打紗練椎庶民則椎髻衣服貴者用渾金線爲納石失亦或腰線繡通神襴然上下均可服等威不甚辨也 繖蓋授宣者用褐羅授敕者用青羅 北人華靡之服

帽則金其頂襖則線其腰鞞則鷲其頂

以上六條見葉子奇草木子

御史中丞崔或進傳國璽牋曰臣崔或言至元三十一年歲次甲午春正月旣旦臣番直宿衛御史臺通事臣闊闊朮告言大師國王之孫曰拾得者嘗官同知通政院事歿後家貧其妻子斥賣貨產有玉印一方闊闊朮蒙古人不曉文字茲故來告臣取視之色混青綠而玄光采射人其

方可黍尺四寸厚及方之三不足背紐盤螭四厭方際紐盡璽罅之上通一橫竅可徑三分舊貫以韋條面有篆文八皆若蟲鳥魚龍之狀急召監察御史臣楊桓至讀其文曰受命於天既壽永昌此傳國寶璽文也臣等肅然起敬乃加以淨絲複以白帕率御史臣楊桓通事臣闊闕朮等直趨青宮因都指揮使詹事臣王慶端家令臣阿散罕詹事院判臣僕散壽導謁進獻徽仁裕聖皇太后御前啟曰此古傳國璽也秦以和氏璧所造厥後有天下者寶之以君萬國然自前代失之已久今當宮車晚出諸大臣僉議迎請皇太孫龍飛之時不求而見此乃天示瑞應宜早達於皇太孫行殿以符靈貺已蒙嘉納翼日令中書右丞詹事丞張九思詹事院判臣僕散壽傳皇太孫親爲付授此

元史卷七十八志

禮

美

蓋皇太后懿慮深遠非臣等愚昧所能及竝蒙傳旨賜收玉之家楮幣二千五百貫竝逮臣等三人衣段各一表裏紋金綺素有差是日中書右丞相臣完澤率集賢翰林侍從諸臣入賀御前命出寶璽徧示羣臣丞相以下臺臣等次第上壽自是內外稱慶咸曰天命有歸

見孔齊至正直說

順帝至元間太師柏顏擅權盡出大府監所藏歷代舊璽磨去篆文以爲鷹隊及改作押字圖書分賜其黨獨唐則天一璽玉色瑩白製作一如官印其螭紐高聳於上璞僅半寸而文深不可改用遂付藝文監收之國朝凡官至一品者得旨則用玉圖書押字文宗開奎章閣作二璽一曰天庥之寶一曰奎章閣寶命虞集篆文順帝元統二年作二小璽一曰明仁殿寶一曰洪禧命楊瑀篆文洪禧小璽

其璞純白上有一墨色龜紐觀者以爲二玉相聯不知實一玉也上尤喜用貯以金函錦囊命高昌世傑班掌之世傑班者大司徒沙刺班之子也年方十五歲爲尙輦奉御掌此小璽懸於項實於袖中經年其母不知親友或叩以內庭事則答以他語其慎密視孔光尤過之

見楊瑀山居新語

元史卷七十八

志

禮

三

樂

制樂始末

太祖初年徵用西夏舊樂太宗十年十一月宣聖五十一代孫衍聖公元措來朝奏請各路訪求亡金太常故臣及禮冊樂器詔徙其人器赴東平令元措領之於本路稅課所給其食十一年元措得金掌樂許政掌禮王節及樂工翟剛等九十二人於燕京十二年夏四月始命製登歌樂肄習於曲阜宣聖廟十六年太常用許政所舉大樂令苗蘭詣東平指授工人造琴十張一絃三絃五絃七絃九絃者各二憲宗二年三月命東平萬戶嚴忠濟立局製冠冕法服鐘磬箏篥儀物肄習五月召太常禮樂人赴日月山

元史卷七十九

志

樂

一

八月七日學士魏祥卿徐世隆郎中姚樞等以樂工李明昌許政吳德段楫寇忠杜延年趙德等五十餘人見於行宮帝問制作禮樂之始世隆對曰堯舜之世禮樂興焉時明昌等各執鐘磬笛簫篪塤巢笙於帝前奏之曲終復合奏之凡三終十一日始用登歌樂祀昊天上帝於日月山祭畢命驛送樂工還東平世祖中統元年春正月命宣撫廉希憲等召太常禮樂人至燕京秋七月用新製雅樂享祖宗於中書省禮畢賜預祭官及禮樂人百四十九人鈔有差八月命太常禮樂人復還東平二年秋九月敕太常少卿王鏞領東平樂工常加督視肄習以備朝廷之用五年定名曰大成之樂至元元年冬十有一月括金樂器散在寺觀民家者先是括到燕京鐘磬等器凡三百九十有

九事下翟剛辨驗給價至是大興府又以所括鐘磬樂器十事來進太常因言亡金散失樂器不止在於燕京合於各路括之庶省鑄造於是奏檄各道宣慰司括到鐘三百六十有七磬十有七鐔一送於太常又中都宣德平灤順天河東眞定西京大名濟南北京東平等處括到大小鐘磬五百六十有九其完者景鐘二鐔鐘十六大聲鐘十中聲鐘一小聲鐘二十有七編鐘百五十有五編磬七其不完者景鐘四鐔鐘二十有三大聲鐘十有三中聲鐘一小聲鐘四十有五編鐘二百五十有一編磬十有四二年初用宮縣登歌樂文武二舞於太廟先是東平萬戶嚴忠範奏太常登歌樂器樂工已完宮縣樂文武二舞未備凡人四百有十二請以東平漏籍戶充之合用樂器官爲置

元史卷七十九

志 樂

二

備制可丞相耶律鑄又言今製宮縣大樂內編磬十有二簣立於諸處選石材爲之太常寺以新撥宮縣樂工文武二舞四百有十二人未習其藝遣大樂令許政往東平教之大樂署言堂上下樂舞官員及樂工合用衣服冠冕鞞履等物乞行製造中書禮部移準太常博士議定制度下所屬製造宮縣樂器既成太樂署郭敏開坐名數以上編鐘磬三十有六簣樹鼓四建鞞應同一座晉鼓一路鼓二鼗鼓三相鼓二雅鼓二柷一敔一笙二十有七巢和竿塤八篪簫篴笛各十琴二十有七瑟十有四單鐸雙鐸鐔鉦麾旌纛各二補鑄編鐘百九十有二靈壁石磬如其數省臣言太廟殿室向成宮縣樂器成備請徵東平樂工赴京師肄習以俟享廟制可秋七月新樂服成樂工至自東平敕翰林

院定撰八室樂章大樂署編運舞節俾肄習之冬十有一月有事於太廟宮縣登歌樂文武二舞咸備其迎送神曲曰來成之曲烈祖曰開成之曲太祖曰武成之曲太宗曰文成之曲皇伯考尤赤曰弼成之曲皇伯考察合帶曰協成之曲睿宗曰明成之曲定宗曰熙成之曲憲宗曰威成之曲初獻升降曰肅成之曲司徒奉俎曰嘉成之曲文舞退武舞進曰和成之曲亞終獻酌獻曰順成之曲徹豆曰豐成之曲文舞曰武定文綏之舞武舞曰內平外成之舞第一成象滅王罕二成破西夏三成克金四成收西域定河南五成取西蜀平南詔六成臣高麗服交趾十有二月籍近畿儒戶三百八十四人爲樂工先是召用東平樂工凡四百一十二人中書以東平地遠惟畱其戶九十有二

元史卷七十九 志 樂

三

餘盡遣還復入民籍十一年秋八月製內庭曲舞中書以上皇帝冊寶下太常太樂署編運無射宮大寧等曲及上

壽曲譜

當時議殿庭用雅樂後不果用

十三年以近畿樂戶多逃亡僅得

四十有二復徵用東平樂工十六年冬十月命太常卿忽

都于思召太常樂工是月十一日大樂令完顏椿等以樂

工見於香閣文郎魏英舞迎神黃鐘宮曲武郎安仁舞亞

獻無射宮曲十八年冬十月昭睿順聖皇后將祔廟製昭

睿順聖皇后室曲舞十九年王積翁奏請徵亡宋雅樂器

至京師置於八作司二十一年太樂署言宜付本署收掌

中書命八作司與之鑄鐘二十有七編鐘七百二十有三

特磬二十有二編磬二十有八鏡六單鐸雙鐸各五鉦鐃

各八二十二年冬閏十一月太常卿忽都于思奏大樂見

用石磬聲律不協稽於古典磬石莫善於泗濱女真未嘗
得此今泗在封疆之內宜取其石以製磬從之選審聽音
律大樂正趙榮祖及識辨磬材石工牛全詣泗州采之得
磬璞九十製編磬二百三十命大樂令陳革等料簡應律
者百有五二十三年忽都于思又奏太廟樂器編鐘笙匏
歲久就壞音律不協遂補鑄編鐘八十有一合律者五十
造笙匏三十有四二十九年四月太常卿香山請采石增
制編磬遣孔鑄馳驛往泗州得磬璞五十八製磬九十大
樂令毛莊等審聽之得應律磬五十有八於是編磬始備
三十年夏六月初立社稷命大樂正許德良運製曲譜翰
林院定撰樂章其降送神曰鎮靈之曲初獻盥洗升壇降
壇望瘞位皆肅靈之曲正配位奠玉幣曰億靈之曲司徒

元史卷七十九 志 樂

四

奉俎徹豆曰豐靈之曲正配位酌獻曰保靈之曲亞終獻
曰咸靈之曲按祭社稷先農及大德六年祀天地五方帝
樂章皆用金舊名釋奠宣聖亦因宋不改詳

樂章三十一年世祖裕宗祔廟命大樂署編運曲譜舞節

翰林定撰樂章世祖室曰混成之曲裕宗室曰昭成之曲

成宗大德九年新建郊壇既成命大樂署編運曲譜舞節

翰林撰樂章十一月二十八日祀圓丘用之其迎送神曰

天成之曲初獻奠玉幣曰欽成之曲酌獻曰明成之曲登

降曰隆成之曲亞終酌獻曰和成之曲奉饌徹豆曰靈成

之曲望燎如登降惟用黃鐘宮文舞曰崇德之舞武舞曰定功

之舞十年命江浙行省製造宣聖廟樂器以宋舊樂工施

德仲審較應律運至京師秋八月用於廟祀宣聖先令翰

林新撰樂章命樂工習之降送神曰凝安之曲初獻盥洗

升殿降殿望瘞皆同安之曲奠幣曰明安之曲奉俎曰豐安之曲酌獻曰成安之曲亞終獻曰文安之曲徹豆曰娛

安之曲蓋舊曲也新樂章不果用十一年武宗卽位祭告

天地命大樂署編運皇地祇酌獻大呂宮一曲及舞節翰

林譔樂章無曲名九月順宗成宗二室祔廟下大樂署編運

曲譜舞節翰林譔樂章順宗室曰慶成之曲成宗室曰守

成之曲至大二年親享太廟皇帝入門奏順成之曲盥洗

升殿用至元中初獻升降肅成之曲亦曰順成之曲出入

小次奏昌寧之曲迎神用至元中來成之曲改曰思成初

獻攝太尉盥洗升殿奏肅寧之曲酌獻太祖室仍用舊曲

改名開成開成本至元中烈祖曲睿宗室仍用舊曲改名

武成此亦至元中太祖舊曲也皇帝飲福登歌奏釐成之曲新製

元史卷七十九 志 **樂** **五**

曲 **文舞退武舞進奏和成之曲** 舊名肅寧 **亞終獻酌獻奏順成**

之曲 舊名肅寧 **徹豆曰豐成之曲** 舊名肅寧 **送神曰保成之曲** **皇帝**

出廟廷亦曰昌寧之曲 太常集禮曰樂章據孔思逮本錄

者金曲也國初禮樂之事悉用前代舊工循習故常遂有

用其舊者亦有不用其詞而冒以舊號者如郊祀先農等

樂是也 **冬十有二月始製先農樂章以太常登歌樂祀之先**

是有命祀先農以登歌樂如祭社稷之制大樂署言禮祀

先農如社遂錄祭社林鐘宮鎮寧等曲以上蓋金曲也三

年冬十月置曲阜宣聖廟登歌樂初宣聖五十四代孫左

三部照磨孔思逮言闕里宣聖祖廟釋奠行禮久闕祭服

登歌之樂未蒙寵賜請移咨江浙行省製造登歌樂器及

祭服以備祭祀庶盡事神之禮從之至是樂器成頒闕里

十有一月敕以冬至祀昊天上帝于南郊配以太祖令大

樂署運製配位及親祀曲譜舞節翰林撰樂章皇帝出入中壇黃鐘宮曲二盥洗黃鐘宮曲一升殿登歌大呂宮曲

一酌獻黃鐘宮曲一飲福登歌大呂宮曲一出入小次黃

鐘宮曲一皆無四年夏六月武宗祔廟命樂正謝世寧等

編曲譜舞節翰林侍講學士張士觀撰樂章曲名威成之

曲仁宗皇慶二年秋九月用登歌樂祀太上皇睿宗於眞定

玉華宮自是歲用之至延祐七年春三月奏罷延祐五年

命各路府宣聖廟置雅樂選擇習古樂師教肄生徒以供

春秋祭祀六年秋八月議置三皇廟樂不果行七年仁宗

祔廟命樂正劉瓊等編運酌獻樂譜舞節翰林撰樂章曲

名曰歆成之曲英宗至治二年冬十月用登歌樂於太廟

泰定初英宗祔廟下大樂署編運樂譜舞節翰林撰樂章

元史卷七十九志樂

六

曲曰獻成之曲文宗天厯三年春三月明宗祔廟下大樂

署編運樂譜舞節翰林撰樂章曲曰永成之曲

樂章

樂舞樂器並沿前代不復志其樂章亦沿襲爲多至禘祫之禮有元終代未嘗一行而有禘祫樂章蓋撰而未用也故記其律呂節次而不載其辭

郊祀樂章

其詞皆襲金舊故不錄

成宗大德六年合祭天地五方帝樂章

降神奏乾寧之曲六成

圓鐘宮三成

黃鐘角一成

太簇徵一成

姑洗羽一成

初獻盥洗奏肅寧之曲

黃鐘宮

初獻升降奏肅寧之曲

大呂宮

奠玉幣奏

大呂宮

迎俎奏豐寧之曲

黃鐘宮

酌獻奏嘉寧之曲

大呂宮

亞獻奏咸寧之曲

黃鐘宮

終獻

同前

元史卷七十九

志

樂

七

徹邊豆奏豐寧之曲

大呂宮

送神奏

圓鐘宮

望燎奏

黃鐘宮

大德九年以後定擬親祀樂章

親祀未嘗舉行故其詞不錄

皇帝入中壇

黃鐘宮

皇帝盥洗

黃鐘宮

皇帝升壇

降同

大呂宮

降神奏天成之曲

圓鐘宮三成

黃鐘角一成

太簇徵一成

姑洗羽一成

初獻盥洗奏隆成之曲

黃鐘宮

初獻升壇降同奏隆成之曲

大呂宮

奠玉幣正配位同奏欽成之曲

黃鐘宮

元史卷七十九

志

樂

八

司徒奉俎奏寧成之曲

黃鐘宮

昊天上帝位酌獻奏明成之曲

黃鐘宮

皇地祇位酌獻

大呂宮

太祖位酌獻

黃鐘宮

皇帝飲福

大呂宮

皇帝出入小次

黃鐘宮

文舞退武舞進奏和成之曲

黃鐘宮

亞終獻奏和成之曲

黃鐘宮

徹籩豆奏寧成之曲

大呂宮

送神奏天成之曲

圓鐘宮

望燎奏隆成之曲

黃鐘宮

皇帝出中壇

黃鐘宮

元史卷七十九

志

樂

九

宗廟樂章

世祖中統四年至元三年七室樂章

太常集禮彙云此係卷贖所載不具

錄其七室之制第一室太祖第二室太宗三睿宗四

皇伯考朮赤五皇伯考察合帶六定宗七憲宗

至元四年至十七年八室樂章

太常集禮云周馥所藏儀注所錄舞節同

迎神奏來成之曲九成

黃鐘宮三成

大呂角二成

太簇徵二成

應鐘羽二成

初獻盥洗奏肅成之曲

再請盥洗同至大以後名順成之曲詞律同

無射宮

初獻升殿登歌樂奏肅成之曲

降同

夾鐘宮

司徒奉俎奏嘉成之曲

別本所錄親祀樂章詞同

無射宮

烈祖第一室奏開成之曲

無射宮

太祖第二室奏武成之曲

無射宮

太宗第三室奏文成之曲

無射宮

皇伯考朮赤第四室奏弼成之曲

無射宮

皇伯考察合帶第五室奏協成之曲

元史卷七十九

志

樂

無射宮

睿宗第六室奏明成之曲

無射宮

定宗第七室奏熙成之曲

無射宮

憲宗第八室奏威成之曲

無射宮

文舞退武舞進奏和成之曲

別本所錄親祀樂章詞同

無射宮

亞獻行禮奏順成之曲

終獻詞律同

無射宮

徹籩豆登歌樂奏豐成之曲

夾鐘宮

送神奏來成之曲

或作保成

黃鐘宮

至元十八年冬十月世祖皇后祔廟酌獻樂章

太常集禮云卷贖所

載不具錄

親祀禘祫樂章

世祖至元以前未嘗親祀太廟禘祫則終元之世未嘗舉行其所擬而未用之樂章

例不當載

皇帝入門宮縣奏順成之曲

無射宮

皇帝升殿奏順成之曲

夾鐘宮

皇帝詣鬻洗宮縣奏順成之曲

元史卷七十九

志

樂

十一

無射宮

皇帝詣酌尊所宮縣奏順成之曲

無射宮

迎神宮縣奏思成之曲

至元四年名來成之曲詞律同

司徒奉俎宮縣奏嘉成之曲

至元四年詞律同

酌獻始祖宮縣奏慶成之曲

無射宮

諸廟奏熙成昌成鴻成樂成康成明成等曲

文舞退武舞進宮縣奏肅成之曲

亞終獻宮縣奏肅成之曲

皇帝飲福登歌奏釐成之曲

夾鐘宮

徹豆登歌奏豐成之曲

裕宗夾鐘宮

送神奏保成之曲

黃鐘宮

武宗至大以後親祀攝樂章

太常集禮云孔思速本所錄

皇帝入門奏順成之曲

別本親祀禘禘樂章詞律同

皇帝盥洗奏順成之曲

至元四年名肅成之曲詞律同

皇帝升殿登歌奏順成之曲

別本親祀樂章詞律同

皇帝出入小次奏昌寧之曲

太常集禮云此金曲思選取之詳見制樂始末

無射宮

迎神奏思成之曲

至元四年名來成之曲詞律同

黃鐘宮三成

元史卷七十九

志

樂

十一

大呂角二成

太簇徵二成

應鐘羽二成

初獻盥洗奏肅成之曲

別本親祀樂章名順成之曲詞律同

初獻升殿

降

登歌樂奏肅寧之曲

至元四年名肅成之曲詞律同

司徒奉俎奏嘉成之曲

至元四年名詞律同

太祖第一室奏開成之曲

至元四年名詞律同

睿宗第二室奏武成之曲

至元四年名詞律同

世祖第三室奏混成之曲

無射宮

裕宗第四室奏昭成之曲

無射宮

順宗第六室奏慶成之曲

無射宮

成宗第七室奏守成之曲

無射宮

武宗第八室奏威成之曲

無射宮

仁宗第九室奏歆成之曲

無射宮

英宗第十室奏獻成之曲

無射宮

皇帝飲福登歌樂奏釐成之曲

夾鐘宮

元史卷七十九 樂

三

文舞退武舞進奏肅成肅盜之曲至元四年名順成之曲詞律同

亞終獻行禮宮縣奏肅成之曲至元四年名豐成之曲詞律同

徹邊豆登歌樂奏豐寧之曲至元四年名來成之曲詞律同

送神奏保成之曲至元四年名來成之曲詞律同

皇帝出廟廷奏昌寧之曲

無射宮

文宗天祿三年明宗耐廟酌獻奏永成之曲

無射宮

社稷樂章

降神奏鎮寧之曲

林鐘宮二成

太簇角二成

姑洗徵二成

南呂羽二成

初獻盥洗奏肅寧之曲

太簇宮

初獻升壇奏肅寧之曲

降同

應鐘宮

正配位奠玉幣奏億寧之曲

太簇宮

司徒奉俎奏豐寧之曲

太簇宮

正位酌獻奏保寧之曲

太簇宮

元史卷七十九 志 樂

十四

配位酌獻奏保寧之曲

太簇宮

亞終獻奏咸寧之曲

太簇宮

徹豆奏豐寧之曲

應鐘宮

送神奏鎮寧之曲

林鐘宮

望瘞位奏肅寧之曲

太簇宮

先農樂章

降神奏鎮寧之曲

林鐘宮二成

太簇角二成

姑洗徵二成

南呂羽二成

初獻盥洗奏肅寧之曲

太簇宮

初獻升壇降同奏肅寧之曲

應鐘宮

正配位奠玉幣奏億寧之曲

太簇宮

司徒奉俎奏豐寧之曲

太簇宮

元史卷七十九 志 樂

正位酌獻奏保寧之曲

太簇宮

配位酌獻奏保寧之曲

太簇宮

亞終獻奏咸寧之曲

太簇宮

徹豆奏豐寧之曲

應鐘宮

送神奏鎮寧之曲

林鐘宮

望瘞位奏肅寧之曲

太簇宮

宣聖廟樂章 襲舊詞不錄

迎神奏凝安之曲

黃鐘宮三成

大呂角二成

太簇徵二成

應鐘羽二成

初獻盥洗奏同安之曲

姑洗宮

初獻升殿奏同安之曲 降同

南呂宮

奠幣奏明安之曲

南呂宮

元史卷七十九 志樂

六

奉俎奏豐安之曲

姑洗宮

大成至聖文宣王位酌獻奏成安之曲 延祐三年始增曾子子思二位則此

樂章亦延祐所定

南呂宮

克國復聖公位酌獻奏成安之曲

南呂宮

邠國宗聖公酌獻奏成安之曲 惟此二章元代所增其餘十四章皆襲宋舊蓋顏曾

思孟並配始於宋度宗咸淳二年故大晟樂無之也

南呂宮

沂國述聖公酌獻奏成安之曲

南呂宮

鄒國亞聖公酌獻奏成安之曲

南呂宮

亞獻奏文安之曲終獻同

姑洗宮

飲福受胙與盥洗同惟國學釋奠親祀用之攝事則不用外路州縣並皆用之

徹豆奏娛安之曲

南呂宮

送神奏凝安之曲

黃鐘宮

望瘞與盥洗同

右釋奠樂章皆宋時大晟樂府舊曲元朝嘗擬撰

易而未及用今並附於此元代擬撰十一章見下

元史卷七十九志樂

七

存九章者以鄒國沂國二章已采入前也

迎神奏文明之曲

盥洗奏昭明之曲

升殿奏景明之曲降同

奠幣奏德明之曲

文宣王酌獻奏誠明之曲

兗國公酌獻奏誠明之曲

鄒國公酌獻見前

沂國公酌獻見前

鄒國公酌獻奏誠明之曲

亞獻奏靈明之曲終獻同

送神奏慶明之曲

宴樂之器

雅樂不志而宴樂特志之者虛文不如實事且明雅不勝鄭也

興隆笙者中統閒回國所進以竹爲之簧有聲而無律玉宸樂院判官鄭秀乃攷音律分定清濁增其制以柎木爲之形如夾屏上銳而面平縷金雕鏤枇杷寶相孔雀竹木雲氣兩旁側立花板居背三之一中爲虛櫃如笙之匏上豎紫竹管九管端實以木蓮苞櫃外出小檝十五上豎小管管端實以銅杏葉下有座師象遠之座上櫃前立花板一雕鏤如背板閒出二皮風口用則設朱漆小架於座前繫風囊於風口囊面如琵琶朱漆雜花有柄一人按小管一人鼓風囊則簧自隨調而鳴其在殿上者盾頭兩旁

元史卷七十九志樂

六

立刻木孔雀二飾以眞孔雀羽中設機每奏工三人一人鼓風囊一人按律一人運動其機則孔雀飛舞應節殿庭笙十延祐閒增制不用孔雀

琵琶制世所通習以木曲首長頸四軫頸有品闊面四絃面飾雜花

賀布思者制如琵琶直頸無品有小槽圓腹如半瓶榼以皮爲面四絃皮絳同一孤柱

胡琴者制如賀布思卷頸龍首二絃用弓振之弓之絃以馬尾

箜篌者制以木闊腹腹下施橫木而加軫二十四柱頭及首竝加鳳喙

笙簫箏笛之制亦世所通習箏如瑟兩頭微垂有柱十三

絃有箏者制如箏而七絃有柱用竹軋之羌笛者制如笛而長三孔龍笛者制如笛七孔橫吹之管首制龍頭銜同心結帶

頭管者制以竹爲管卷蘆葉爲首竅七

鼓制亦世所通習以木爲匡冒以革朱漆雜花面繪複身龍長竿二廷中設則有大木架又有擊搥高座

杖鼓者制以木爲匡細腰以皮冒之上施五綵繡帶右擊以杖左拍以手札鼓者制如杖鼓而小左持而右擊之和鼓者制如大鼓而小左持而右擊之

方響者制以鐵十六枚懸於磬簾小角槌二廷中設下施小交足几黃羅銷金衣

雲璈者制以銅爲小鑼十三同一木架下有長柄左手持而右手以小槌擊之

元史卷七十九志

樂

五

戲竹制如簞長二尺餘上繫流蘇香囊執而偃之以止樂水盞制以銅凡十有二擊以鐵箸

拍板制以木爲板以繩聯之

樂隊

樂音王隊元旦用之引隊大樂禮官二員冠展角幘頭紫袍塗

金帶執笏次執戲竹二人同前服次樂工八人冠花幘頭紫窄衫銅束帶龍笛三杖鼓三金鞀小鼓一板一奏萬年歡之曲從東階升至御前以次而西折繞而南北向立

後進皆後做此後次二隊婦女十人冠展角幘頭紫袍隨樂聲進至御

前分左右相向立次婦女一人冠唐帽黃袍進北向立定樂止念致語畢樂作奏長春柳之曲次三隊男子三人戴

紅髮青面具雜綵衣次一人冠唐帽綠襪袍角帶舞蹈而進立於前隊之右次四隊男子一人戴孔雀明王像面具披金甲執叉從者二人戴毗沙神像面具紅袍執斧次五隊男子五人冠五梁冠戴龍王面具繡斨圭與前隊同進北向立次六隊男子五人爲飛天夜叉之像舞蹈以進次七隊樂工八人冠霸王冠青面具錦繡衣龍笛三鬻栗三杖鼓二與前大樂合奏吉利牙之曲次八隊婦女二十人冠廣翠冠銷金綠衣執牡丹花舞唱前曲與樂聲相和進至御前北向列爲九重重四人曲終再起與後隊相和次九隊婦女二十人冠金梳翠花鈿繡衣執花鞵稍子鼓舞唱前曲與前隊相和次十隊婦女八人花髻服銷金桃紅衣搖日月金鞵稍子鼓舞唱同前次男子五人作五方

菩薩梵像搖日月鼓次一人作樂音王菩薩梵像執花鞵稍子鼓齊聲舞前曲一闋樂止次婦女三人歌新水令沽美酒太平令之曲終誦口號畢舞唱相和以次而出

壽星隊

天壽節用之

引隊禮官樂工大樂冠服竝同樂音王隊

次二隊婦女十人冠唐巾服銷金紫衣銅束帶次婦女一人冠平天冠服繡鶴斨方心曲領執圭以次進至御前立定樂止念致語畢樂作奏長春柳之曲次三隊男子三人冠服舞蹈竝同樂音王隊次四隊男子一人冠金漆弁冠服緋袍塗金帶執笏從者二人錦帽繡衣執金字福祿牌次五隊男子一人冠捲雲冠青面具綠袍塗金帶分執梅竹松椿石同前隊而進北向立次六隊男子五人爲烏鴉之像作飛舞之態進立於前隊之左樂止次七隊樂工十

有二人冠雲頭冠銷金緋袍白裙龍笛三觶栗三札鼓三和鼓一板一與前大樂合奏山荆子帶祇神急之曲次八隊婦女二十人冠鳳翹冠翠花鈿服寬袖衣加雲肩霞綬玉佩各執寶蓋舞唱前曲次九隊婦女三十人冠玉女冠翠花鈿服黃銷金寬袖衣加雲肩霞綬玉佩各執櫻毛日月扇舞唱前曲與前隊相和次十隊婦女八人服雜絲衣被榭葉魚鼓簡子次男子八人冠束髮冠金掩心甲銷金緋袍執戟次爲龜鶴之像各一次男子五人冠黑紗帽服繡鶴髦朱履策龍頭藜杖齊舞唱前曲一闋樂止次婦女三人歌新水令沽美酒太平令之曲終誦口號畢舞唱相和以次而出

禮樂隊

朝會用之

引隊禮官樂工大樂冠服並同樂音王隊次

樂

三

二隊婦女一人冠黑漆弁冠服青素袍方心曲領白裙束帶執圭次婦女一人冠九龍冠服繡紅袍玉束帶進至御前立定樂止念致語畢樂作奏長春柳之曲次三隊男子三人冠服舞蹈同樂音王隊次四隊男子三人皆冠捲雲冠服黃袍塗金帶執圭次五隊男子五人皆冠三龍冠服紅袍各執劈正金斧同前隊而進北向立次六隊童子五人三髻素衣各執香花舞蹈而進樂止次七隊樂工八人皆冠束髮冠服錦衣白袍龍笛三觶栗三杖鼓二與前大樂合奏新水令水仙子之曲次八隊婦女二十人冠籠巾服紫袍金帶執笏歌新水令之曲與樂聲相和進至御前分爲四行北向立鞠躬拜興舞蹈叩頭三呼就拜再拜畢復趁聲歌水仙子之曲一闋再歌青山口之曲與後隊相

和次九隊婦女二十人冠車髻冠服銷金藍衣雲肩佩綬
執孔雀幢舞唱與前隊相和次十隊婦女八人冠翠花唐
巾服錦繡衣執寶蓋舞唱前曲次男子八人冠鳳靴兜牟
披金甲執金戟次男子一人冠平天冠服繡鶴髦執圭齊
舞唱前曲一闕樂止次婦女三人歌新水令沽美酒太平
令之曲終誦口號畢舞唱相和以次而出

說法隊引隊禮官樂工大樂冠服竝同樂音王隊次二隊
婦女十人冠僧伽帽服紫禪衣阜條次婦女一人服錦袈
袈餘如前持數珠進至御前北向立定樂止念致語畢樂
作奏長春柳之曲次三隊男子三人冠服舞蹈竝同樂音
王隊次四隊男子一人冠隱士冠服白紗道袍阜條執塵
拂從者二人冠黃包巾服錦繡衣執令字旗次五隊男子

元史卷七十九

志

樂

三

五人冠金冠披金甲錦袍執戟同前隊而進北向立次六
隊男子五人爲金莢鵬之像舞蹈而進樂止次七隊樂工
十有六人冠五福冠服錦繡衣龍笛六鬢栗六杖鼓四與
前大樂合奏金字西番經之曲次八隊婦女二十人冠珠
子菩薩冠服銷金黃衣纓絡佩綬執金浮屠白傘蓋舞唱
前曲與樂聲相和進至御前分爲五重重四人曲終再起
與後隊相和次九隊婦女二十人冠金翠菩薩冠服銷金
紅衣執寶蓋舞蹈與前隊相和次十隊婦女八人冠青螺
髻冠服白銷金衣執金蓮花次男子八人披金甲爲八金
剛像次一人爲文殊像執如意一人爲普賢像執西番蓮
花一人爲如來像齊舞唱前曲一闕樂止次婦女三人歌
新水令沽美酒太平令之曲終誦口號畢舞蹈相和以次

而出以上舊志

樂惟郊祀天地祭宗廟祀先聖大朝會用雅樂蓋宋徽宗所制大晟樂也曲宴用細樂胡樂駕行前部用胡樂駕前用清樂大樂其部隊遵依金制駕後用馬軍栲栳隊其俗有十六天魔舞蓋以珠纓盛飾美女十六人爲佛菩薩相而舞不盡始於順帝也見葉子奇草木子

惟郊天則修大駕而用輦其餘巡行兩都多用氍毹車散樂則立教坊司掌天下妓樂有駕前承應雜戲飛竿走索踢弄藏掖等伎見葉子奇草木子

畏吾兒僧閻閻嘗爲會福院提舉乃國朝總統南的沙之子世習二十絃卽箏篋也悉以銅爲絃樂工皆不能用也

鑊鐵器曰胡布斯者世所罕有乃回回國中上用之樂

元史卷七十九志

樂

三

制作輕妙中土鐵工不能爲

見孔齊至正直記

元史卷七十九終

選舉

元太祖龍興塞外西征北伐日不暇給何暇議及敷文取士之事及太宗定中原所得金源文士漸多丞相耶律楚材史天澤始建科舉之議王鶚等輔太子於東宮許衡爲祭酒於國學議章程擬制度而終未施行直至仁宗始令行省舉鄉試京師策進士其法一如宋制而後此色目人柏顏之徒尙屢撓其事見於呂思誠許有壬傳者屢興屢廢蓋文教之難興如此哉然李齊李黼秦不華余闕皆以大魁著忠義大節養士之報何負於國至明人說部稱蒙古代宋第其人爲十等有一官二吏三僧四道五兵六農七匠八倡九儒十丐之說又或謂元取士有詞曲科皆無稽之談誣謗勝國薦紳君子弗道焉

元史卷八十志

選舉

科目

元太宗初取中原中書令耶律楚材請用儒術選士從之九年秋八月詔斷事官木忽台與山西東路課稅所長官劉中歷諸路考試分史論經義詞賦三科作三日程專治一科能兼者聽其中選者復其賦役令與各處長官同署公事得東平楊奐等皆一時名士而當世阻漢法者不便之事遂中止世祖至元初命丞相史天澤條具當行大事嘗及科舉而未果行四年九月翰林學士承旨王鶚等請行選舉法歷舉兩漢隋唐科目取士及近代遼金選舉用人與本朝太宗得人之效以爲貢舉法廢士無入仕之階或習刀筆爲吏胥或執僕役事官僚或作技巧販鬻爲工

商皆不如經義科舉之足以造就人才矧先朝故典尤宜繼述詔中書左三部與翰林學士議立程式王鶚又請依前代立國學選蒙古職官子孫百人專命師儒教習經書俟其藝成然後試用庶幾勳舊之家人材輩出以備超擢十一年十一月裕宗在東宮時復因省臣言準蒙古進士科及漢人進士科參酌時宜以立制度終未施行至二十一年九月丞相和魯霍孫與畱夢炎等言皆以爲天下習儒者少而由刀筆吏得官者多請復貢舉取士凡蒙古之士及儒吏陰陽醫術皆令試舉則人知向學帝可其奏繼而許衡亦議學校科舉之法罷詩賦重經學定爲新制事雖未及行而選舉之制已立至仁宗皇慶二年中書省臣奏科舉事世祖裕宗累嘗命行成宗武宗尋亦有旨今不

元史卷八十一志

選舉

二

以聞恐或有沮其事者請立德行明經科定一代取士法帝然之乃下詔曰惟我祖宗以神武定天下世祖皇帝設官分職徵用儒雅崇學校爲育材之地議科舉爲取士之方規模宏遠矣朕以眇躬獲承丕祚繼志述事祖訓是式若稽三代以來取士各有科目要其本末舉人宜以德行為首試藝則以經術爲先詞章次之浮華過實朕所不取爰命中書參酌古今定其條制其以皇慶三年八月天下郡縣與其賢者能者充貢有司次年二月會試京師中選者朕將親策焉具合行事宜於後科場每三歲一次開試舉人從本貫官司於諸色戶內推舉年及二十五以上鄉黨稱其孝弟朋友服其信義經明行修之士結罪保舉以禮敦遣資諸路府其或徇私濫舉并應舉而不舉者究治

之其考試程式蒙古色目人第一場經問五條太學論語孟子中庸內設問用朱氏章句集註其義理精明文辭典雅者爲中選第二場策一道以時務出題限五百字以上漢人南人第一場明經經疑二問大學論語孟子中庸內出題竝用朱氏章句集註復以己意結之限三百字以上經義一道各治一經詩以朱氏爲主尙書以蔡氏爲主周易以程氏朱氏爲主已上三經兼用古註疏春秋許用三傳及胡氏傳禮記用古註疏限五百字以上不拘格律第二場古賦詔誥章表內科一道古賦詔誥用古體章表四六參用古體第三場策一道經史時務內出題不矜浮藻惟務直述限千字以上蒙古色目人願試漢人南人科目中選者加一等注授蒙古色目人作一榜漢人南人作一

榜第一名賜進士及第從六品第二名以下及第二甲皆正七品第三甲以下皆正八品兩榜竝同流官子孫蔭敘竝依舊制願試中選者優升一等在官未及流品願試者聽若中選之人已有資級者加等注授其餘條目命中書省議行中書省所定條目鄉試中選者錄文給解咨送禮部以憑照勘鄉試八月會試省部依鄉試例於次年二月御試三月前期奏委考試官監察御史讀卷官於殿廷考試每舉子一名怯薛台一人監守鄉試每處差考試官同考試官各一員竝於見任并在間有德望文學常選官內選差彌封謄錄官各一員凡謄錄試卷并行移文字皆用朱書仍設法關防毋致作敝省部會試都省選委知貢舉同知貢舉官各一員考試官四員監察御史二員彌封謄

錄對讀官監門等官各一員天下行省十一及河東山東
二宣慰司真定東平大都上都腹裏四路鄉試十七處共
選合格者三百人赴會試於中取中選者百人內蒙古色
目漢人南人分卷考試各二十五人所選鄉試合格者三
百人蒙古七十五人色目七十五人漢人七十五人南人
七十五人各行省及二司四路各定額數或多或少不等
鄉試會試許將禮部韻略外餘並不許懷挾文字差搜檢
懷挾官一員三月七日御試舉人於翰林國史院定委監
試官及諸執事初五日各官入院初六日謨策問進呈俟
上采取其策依鄉試程式蒙古色目及漢人南人各一道
初七日執事者望闕設案於堂前置策題於上舉人入院
搜檢訖蒙古人作一甲序立禮生導引至於堂前望闕兩

拜賜策題又兩拜各就次色目人及漢人南人各爲一甲
如前儀每進士一人差蒙古宿衛士一人監視日午賜膳
進士納卷畢出院監試官同讀卷官以所對策第其高下
分爲三甲進奏作二榜用敕黃紙書揭於內前紅門之左
右前一日禮部告諭中選進士以次日詣闕前唱名謝恩
放榜擇日賜恩榮宴於翰林國史院凡預試官竝與宴與
宴官及進士竝簪花至所居擇日恭詣殿廷上謝恩表次
日詣中書省參見又擇日諸進士詣先聖廟行舍菜禮第
一人具祝文行事刻石題名於國子監延祐二年春三月
廷試進士賜護都荅爾張起巖等五十有六人及第出身
有差五年廷試進士護都達爾霍希賢等五十人至治元
年廷試進士秦不華宋本等六十有四人泰定元年廷試

進士八刺張益等八十有四人四年廷試進士阿察赤李
黼等八十有五人天祿三年廷試進士篤列圖王文燧等
九十有七人元統癸酉科廷試進士同同李齊等復增名
額及百人之數稍異其制左右榜各三人皆賜進士及第
餘賜出身有差科舉取士莫盛於斯後三年其制遂罷又
七年而復興稍變程式減蒙古色目人明經二條增本經
義易漢南人第一場四書疑一道爲本經疑增第二場古
賦外於詔誥章表內又科一道有元科目取士之制大略
如此其會試下第者延祐初丞相帖木迭爾阿散及平章
李孟等奏下第舉人年七十以上者與從七品流官致仕
六十以上者與教授原有出身者於應得資品上稍優加
之無出身者與山長學正受省劄有來遲而不及應試者

元史卷八十七

志 選舉

五

依下第恩例不著爲格泰定元年中書省奏蒙古色目人
年三十以上者并兩舉不第者與教授以下與學正山長
漢人南人年五十以上并兩舉不第者與教授以下與學
正山長先有資品出身者更優加之不願仕者令備國子
員後勿爲格從之自餘下第之士恩例不可常得間有試
補書吏以登仕籍者惟已廢復興之後其法始變下第者
悉授以路府學正及書院山長又增取鄉試備榜亦授以
郡學錄及縣教諭於是科舉取士得人爲盛順帝至正二
年二月廷試舉人賜拜住陳祖仁等進士及第進士出身
同進士出身有差凡七十有八人國子生員十有八人蒙
古人六名從六品出身色目人六名正七品出身漢人南
人共六名從七品出身五年三月廷試舉人賜普顏不花

張士堅等進士及第出身有差八年三月廷試舉人賜阿魯輝帖穆爾王宗哲等進士及第出身有差皆如前科之數國子生員亦如之十一年三月廷試舉人賜朵列圖文允中等進士及第出身有差凡八十有三人國子生員如舊制十二年三月詔省院臺不用南人似有偏負率土之濱莫非王臣宐依世祖時用人之法南人有才學者皆令登用自是累科南方進士始有爲御史憲司官尙書者十四年三月廷試舉人賜薛朝昭牛繼志等進士及第出身有差凡六十有二人國子生員亦如舊制十七年三月廷試舉人賜倪徵王宗嗣等進士及第出身有差凡五十有一人國子生員如舊制十九年中書左丞成遵建言宋自景祐以來百五十年雖無兵禍常設寓試名額以待四方

遊士今淮南河南山東四川遼陽等處及江南各省所屬州縣避兵士民會集京師宐依前代故事別設流寓鄉試之科令避兵士民就試許在京官員等結保其鄉里親戚別差試官考校選取則國有得人之效野無遺賢之歎監察御史亦以爲言中書移禮部議流寓儒生應試名數難同全盛之時請減半額擬取合格蒙古色目各十五名漢人二十名南人十五名通六十有五名從之而是歲福建行省鄉試兼取江西流寓者通十有五人貢京師而陝西平章察罕帖木爾又請河南鄉試許避兵儒士不拘籍貫依河南省額數就陝州置貢院應試詔亦從之二十年三月廷試舉人賜買住魏元禮等進士及第出身有差凡三十有五人國子生員如舊制二十三年三月廷試舉人賜

寶寶楊輓等進士及第出身有差凡六十有二人國子生
員如舊制是年六月中書省奏江浙福建舉人涉海道赴
京有六人者已後會試之期宜授以教職其下第三人亦
以教職授之以激勸遠方忠義之士二十五年皇太子撫
軍河東適當大比之歲擴廓以江南四川等處皆阻於兵
其鄉試不廢者惟燕南河南山東陝西河東數道乃啟皇
太子倍增鄉貢之額二十六年三月廷試舉人賜赫德溥
化張棟等進士及第出身有差凡七十有三人優其品秩
第一甲授承直郎正六品第二甲授承務郎從六品第三
甲授從仕郎從七品國子生員蒙古七名正六品色目六
名從六品漢人七名正七品通二十人兵興以後科目取
士莫盛於斯而元之設科亦止於是歲自正二年二月
廷試以下舊附百

元史卷八十志

選舉

七

官志今
移此

學校

一曰蒙古國子學以教習蒙古字世祖至元八年春始詔
立之隨朝蒙古官及怯薛台官員選子弟俊秀者入學然
未有員數以通鑑節要用蒙古語譯寫教之俟學成出題
試問所對精通者量授官職成宗大德十年春二月增生
員廩膳通前三十員爲六十員武宗至大二年定伴讀員
四十人以在籍上名生員學問優長者補之仁宗延祐二
年冬十月以所設生員百人蒙古五十人色目二十人漢
人三十人而百官子弟之就學者常不下二三百人宜增
其廩餼乃減去庶民子弟百十四員聽陪堂學業於見供
生員百名外量增五十名蒙古二十漢人三十至元六年

秋七月置諸路蒙古字學十二月中書省定學制頒行之
命諸路府官子弟入學上路下路各二人府州各一人餘
民閒子弟上路三十人下路二十五人願充生徒者免本
身雜役以譯寫通鑑節要頒行各路俾肄習之至成宗大
德五年冬十月又定生員散府二十人上中州十五人下
州十人元貞元年命有司割地給諸路蒙古學生員餼廩
其學官至元十九年定擬路府路設教授其教蒙古字者
在教各國字之右府州教授一任準從八品再歷路教授
一任準正八品任回本等遷轉大德四年增設學正一員
上自國學下及州縣舉生員高等從翰林考試凡學官譯
史取以充焉

一曰回國子學以教習回回文字世祖至元二十六年

元史卷八十志

選舉

八

夏五月尚書省臣言回回奔思替菲文字宜施於用今翰
林院益福的哈魯丁能通其字學乞授以學士之職凡公
卿大夫與士子皆肄習之是歲八月始置回國子學至
仁宗延祐元年四月復置回國子監設監官以其文字
便於關防取會數目令依舊制篤意頒教泰定二年春閏
正月以近歲公卿大夫子弟與凡民之子入學者眾其學
官及生員五十餘人已給飲膳者二十七人外助教一人
生員二十四人竝給廩膳凡百司庶府所設譯史皆從本
學取充焉

一曰經書國子學以習漢人文字元初定燕京以金樞密
院爲宣聖廟太宗六年以馮志常爲國子學總教命侍臣
子弟十八人入學世祖至元七年命侍臣子弟十有一人

入學以長者四人從許衡童子七人從王恂至二十四年
既遷都北城立國子學於北城之東乃以南城舊國子學
爲大都路學自提舉以下設官有差其國子學之制設博
士通掌學事分敎三齋生員講授經旨是正音訓上嚴敎
導之術下考肄習之業復設助教同掌學事而專守一齋
正錄申明規矩督習課業凡讀書必先孝經小學論語孟
子大學中庸次及詩書禮記周禮春秋易博士助教親授
句讀音訓正錄伴讀以次傳習之講說則依所讀之序正
錄伴讀亦以次傳習之次日抽籤令諸生復說其功課對
屬詩章經解史評則博士出題生員具稟先呈助教俟博
士既定始錄付課簿以憑考校其生員之數定二百人先
令百人及伴讀二十人入學其百人之內蒙古半之色目

元史卷八十一志

選舉

九

漢人半之許衡又著諸生入學雜儀及日用節目俾永爲
定式而遵行之成宗大德八年冬始定國子生蒙古色目
漢人三歲各貢一人十年冬國子學定蒙古色目漢人生
員二百人三年各貢二人武宗至大四年秋定生員額二
百人復立國子學試貢法蒙古授官六品色目正七品漢
人從七品試蒙古生之法宜從寬色目生宜稍加密漢人
諸生則全科場之制仁宗延祐二年秋八月增置生員百
人陪堂生二十人用趙孟頫元明善等所議更定其法一
曰升齋等第六齋東西相向下兩齋左曰游藝右曰依仁
凡誦書講說小學屬對者隸焉中兩齋左曰據德右曰志
道講說四書課肄詩律者隸焉上兩齋左曰時習右曰日
新講說易書詩春秋科習明經義程文者隸焉每齋員數

不等每季考其所習業及不違規矩者以次遞升二曰私試規矩漢人驗日新時習兩齋蒙古色目取志道據德兩齋本學舉實歷坐齋二載以上未嘗犯過者充試限實歷坐齋三載以上充貢舉漢人私試孟月試經疑一道仲月試經義一道季月試策問表章詔誥科一道蒙古色目人孟仲月各試明經一道季月試策問一道辭理俱優者爲上等準一分理優辭平者爲中等準半分每歲終通計其年積分至八分以上者升充高等生員以四十名爲額內蒙古色目各十名漢人二十名歲終試貢員不必備惟取實才有分同闕少者以坐齋日月先後多少爲定三曰黜罰科條應私試積分生員其有不事課業及一切違戾規矩者初犯罰一分再犯罰二分三犯除名應已補高等生

員其有違戾規矩者初犯停試一年再犯除名以上皆從學正錄糾舉之正錄知見而不糾舉者議罰應在學生員歲終實歷坐齋不滿半歲者竝行除名學正錄歲終通行考校除蒙古色目別議外其漢人生員三年不能通一經及不勤學者勒令出學泰定三年夏六月更積分而爲貢舉竝依世祖舊制其貢試之法與前略同而防閑加密其本學正錄各二員司樂一員典籍二員管句一員及侍儀舍人舊例舉積分生員充之後既革積分乃於上齋生員內舉之文宗天祿三年議件讀員數自初二十人歲貢二人後於大德七年定四十人歲貢六人至大四年定四十人歲貢四人延祐四年歲貢八人爲淹滯既額設四十名宜充部令史者四人路教授者四人是後又命所貢生員

每大比選士與天下士同試於禮部策於殿廷又增置備榜而加選擇焉至正八年四月中書省奏準監學生員每歲取及分生員四十人三年應貢會試者凡百二十人除例取十八人外今後再取副榜二十人於內蒙古色目各四名前二名充司鑰下二名充侍儀舍人漢人取十二人前三名充學正司樂次四名充學錄典籍管句以下五名充舍人不願者聽其還齋

其諸路學校之官世祖中統二年始置二十三年詔江南學校舊有學田復給之以養士二十八年令各縣學內設立小學其他先儒名賢過化之所竝立書院凡師儒之命於朝廷者曰教授命於禮部及行省及宣慰司者曰學正山長學錄教諭錄歷兩考升正長正長一考升散府上

元史卷八十

志

選舉

十一

中州教授上中州教授又歷一考升路教授教授之上各省設正副提舉以領學校之事後改直學考滿爲州吏例以下第舉人充正長備榜舉人充諭錄有薦舉者亦參用之凡學校書院生徒之肄業者守令薦舉之臺憲考覈之或用爲教官或取爲吏屬人材往往出其中矣又有醫學陰陽學世祖中統二年大醫院使王猷言醫學久廢後進無所師授竊恐朝廷一時取人學非其傳爲害甚大乃遣副使王安仁授以金牌往諸路設立醫學其生員擬免本身檢醫差占等役俟其學成每月試以疑難量加勸懲後又定醫學之制設諸路提舉綱維之凡宮壺所需省臺所用者得轉入常調可任親民其從大醫院自遷轉者不得視此例然太醫院官旣受宣命皆同文武正官五品以上

遷敘餘以舊品職遞升子孫蔭用同正班敘其掌藥充都監直長充御藥院副使升至大使考滿依舊例於流官銓注諸教授皆從太醫院定擬而各路主善亦擬同教授皆從九品其各處名醫所述醫經文字悉從考校其藥產性味眞僞悉從辨驗其隨路學校歲出十三科疑難題目呈太醫院發下諸路醫學令生員習課年終解送本司以定其優劣世祖至元二十八年始命腹裏江南有通曉陰陽者依儒學醫學之例發往諸路教授其有術數精通者每歲錄呈省府赴都試驗果有異能則於司天臺內許令近侍延祐初令陰陽生依儒醫例於府路州設教授員凡陰陽生皆管轄之而屬於太史焉

舉遺逸以求隱迹之士擢茂異以待非常之人世祖中統

元史卷八十七

志

選舉

三

閒徵許衡爲懷孟教官詔於懷孟等處選俊秀子弟教育之是年又詔徵金進士李冶爲翰林學士徵劉因爲集賢學士不至又用平章咸寧王野仙薦徵蕭𪔐不起卽授陝西儒學提舉至元十八年詔求前代聖賢之後儒醫卜筮通曉天文麻數并山林隱逸之士二十年復召拜劉因右贊善大夫辭不允未幾以親老乞終養俸給一無所受後遣使授命於家辭疾不起二十八年復詔求隱晦之士俾有司具以名聞成宗大德六年徵臨川布衣吳澂擢應奉翰林文字拜命卽歸九年詔求山林閒有德行文學識治道者遣使徵蕭𪔐且曰或不樂從仕可試一來召對遣歸至大三年復召吳澂拜國子司業以病還延祐三年召拜集賢直學士以疾不赴至治三年召拜翰林學士武宗仁

宗累徵蕭颯又以太子右諭德徵始至京師授集賢學士
國子祭酒延祐七年詔曰比歲設立科舉以取人材尙慮
高遠之士晦迹巨園其各處有隱居行義才德高邁深明
治道者所在官司牒報本道廉訪司奏聞以備錄用又屢
詔求言於下雖指斥時政竝無譴責往往采擇任用列諸
庶位以圖治功其他著書立言裨益教化啟迪後人亦斟
酌錄用著爲常式云

童子舉唐宋始著於科亦無常員成宗大德三年舉童子
楊山童海童五年大都提舉學校所舉安西路張秦山江
浙行省舉張昇甫武宗至大元年舉武福安仁宗延祐二
年浙江行省舉俞傅孫馮怙哥六年河南路舉張荅罕學
士完者不花舉丁頑七年河間縣舉杜山童大興縣舉陳

元史卷八十

志 選舉

三

明英宗至治元年福州路連江縣舉陳元麟至治三年河
南行省舉張英泰定四年福州舉葉畱畱文宗天祿二年
舉杜夙靈至順二年制舉答不台子買來的皆以其天資
穎悟超出兒輩或能默誦經文書寫大字或能綴緝辭章
講說經史竝令入國子學校育之而張秦山尤精篆籀陳
元麟能通性理葉畱畱問以四書大義要言不煩時人以
遠大期之

銓法

凡宿衛出身之制元初用左右宿衛爲心膂爪牙故四怯
薛之子孫世爲宿衛之長使得自舉其屬諸怯薛歲久被
遇常加顯擢惟長官薦用則有定制至元二十年議久侍
禁闈門第崇高者初受朝命散官減職事一等否則量減

二等至大四年詔蒙古人降一等色目人降二等漢人降三等

凡臺憲選用之制大德元年省議臺官舊無選法俱於民職選取後互相保選省臺各爲一選定令臺官幕官聽自選擇爲廉訪司則省臺共選若臺官於省部選人則與省官共議之省官於臺憲選人亦與臺官共議之至元八年定監察御史任滿在職無異政元係七品以下者例加一等六品以上者升擢其有不顧權勢彈劾非違及利國便民者別議升除或不稱者斟酌銓注

凡選舉守令之制至元八年詔以戶口增田野闢詞訟簡盜賊息賦役均五事備者爲上選九年以五事備者爲上選升一等四事備者減一資三事有成者爲中選依常例

元史卷八十七

志 選舉

七

遷轉四事不備者增一資五事俱不舉者黜降一等二十三年詔勸課農桑克勤奉職者以次升獎其怠於事者皆罷之二十八年詔路府州縣除達魯花赤外長官竝選用漢人素有聲望及勳臣故家并儒吏出身品資相應者佐貳官遴選色目漢人參用庶政平訟理而民安盜息

凡進用武官之制至元十五年詔軍官有功而升職者舊以其子弟襲職陣亡者亦同若罷去則以有功者代之十七年詔渡江總把百戶有功升遷者總把依千戶降等承襲百戶無遞降職名則從其本等十九年奏擬萬戶千戶百戶物故視其子孫堪承襲者依例承襲外都元帥招討使總管總把視其子孫堪承襲者止令管其元軍元帥招討子孫爲萬戶總管子孫爲千戶總把子孫爲百戶竝給

元佩金銀符病故者降等惟陣亡者本等承襲二十年詔萬戶千戶百戶分上中下三等定立條格通行遷轉以三年爲滿理算資考升加品級若年老病故者令其子弟依例廕敘是年以舊制父子相繼管領元軍不設蒙古軍官故定立資考三年爲滿通行遷轉後各翼大小軍官俱設蒙古軍官又兼調遣征進俱已離翼難與民官一體遷轉廕敘合將萬戶千戶鎮撫以三年爲滿通行遷轉百戶以下不拘此例凡軍官征戰有功過者驗實迹升降又定蒙古奧魯官大翼萬戶下設奧魯總管府從四品小翼萬戶下設奧魯官從五品各千戶奧魯亦設奧魯官受院劄各千戶奧魯不及千戶者或二百戶三百戶以遠就近以小就大合併爲千戶翼奧魯官受院劄若干礙投下難以合

元史卷八十

志

選舉

五

併則俟再議又定首領官受敕牒之制凡元帥招討司經歷知事就充萬戶府經歷知事換降敕牒如元翼該革別與遷除二十四年詔勳閥子弟應襲其父兄之職者當先任以小職俟果有能乃大用之二十五年敕軍官陣亡者本等承襲病故者降二等其子弟無能雖陣亡無用其子弟果能雖病故不必降等各翼達魯花赤亡歿及色目鎮撫已歿其子有能無能用否如前例若無嫡長子孫則以兄弟之子有能者爲之至大二年議各衛翼首領官至經歷以上不得升除似與官軍一體其子弟乃不得承襲今後年踰七十而散官至正從四品者宜正從五品軍官內任用

三院者一曰太禧院天祿元年罷會福殊祥二院而立之

秩正二品其所轄諸司則從其擢用二曰宣徽院皇慶二年省臣奏其所轄倉庫屯田官員半由都省半由本院用之奉旨宜俱從省臣用之三曰中政院至大四年言諸司錢糧選法悉令中書省掌之可更選人任用移文中書給降宣敕延祐七年院臣啟皇后位下中政院用人奉懿旨依樞密院御史臺等例行之

直省舍人者內侍相臣之興居外傳省闈之命令選宿衛及勳臣子弟爲之又擇其高等二人專掌奏事其充是職者俾受宣命歷六月始令從政

凡禮儀諸職有太常寺檢討歷百月除從八品有御史臺殿中司知班歷九十月除正八品有通事舍人從本司選已入流品職官爲之考驗應得資品升一等遷用至元

元史卷八十

志 選舉

夫

三十年議於二品三品官子內選用不限廕敘兩考從七品遷敘有侍儀舍人於四品五品官子內選用不限廕敘一考從九品如不敷於府州儒學教授內選用歷一考正九品敘有禮直管勾省選合用到部人員俱從太常寺舉保有郊壇庫藏都監二人受省劄者歷一考之上受部劄者歷兩考之上再歷本院屬官一任於從九品內敘天祿二年擬在朝文翰衙門於國子生員內舉充

巡檢流外職任三十月爲二考任迴於從九品遷敘至元二十年議巡檢六十月升從九品大德七年議各處所委巡檢已歷兩考之上者循舊例九月出職不及兩考者須歷百有二十月方許出職遷轉

庫官遷轉之制腹裏諸路行用鈔庫於州縣民官內選充

係八品九品人員三十月爲滿任回驗元資品減一資歷
通理敘遷庫使受都省劄付任滿從優遷敘庫副受本路
劄付二十月爲滿於本處上戶內公選交替元係流官任
回者止於流官內任用雜職者雜職內遷敘萬億庫寶鈔
總庫八作司以一年滿代錢物甚多未易交割宜以二年
爲滿少者以一年爲滿上都稅務官止依上例遷轉凡都
省所轄二周歲爲滿者一各處都轉運使司屬官首領官
一各處都漕運使司首領官一諸路寶鈔都提舉司官一
腹裏江南隨路平準行用庫官一印造寶鈔庫官一鐵冶
提舉司首領官一採金提舉司首領官一銀場提舉司首
領官一新舊運糧提舉司首領官一都提舉萬億庫八作
司寶鈔總庫首領官其周歲爲滿者一泉府司所轄富藏

元史卷八十一志 選舉

庫官一廩給司及四寶庫薄斂庫官一大都稅課提舉司
首領官一酒課提舉司首領官一提舉大倉首領官一提
舉醴源倉首領官一大都省倉官一河倉官一通州等處
倉官一大都平準行用庫官一燒鈔四庫官一鈔紙坊官
一幣源庫官其行省所轄二周歲爲滿者一各處都轉運
使司屬官首領官一各處都漕運使司首領官一行諸路
寶鈔都提舉司官一腹裏江南隨路平準行用庫官一甘
州蜜夏府等處都轉運使司官一市舶提舉司首領官一
權茶提舉司首領官其周歲爲滿者一行泉府司所轄阜
通庫官一各處行省收支錢帛諸物庫官

倉官之制凡倉官有關於出身令譯史通事知印宣使奏
差兩考之人內選用依驗難易收糧多寡升等任回遷敘

在都并城外倉分收糧五萬石之上倉官於應得資品上
升一等任滿交割遷敘收糧萬石之上倉官任滿交割減
一資通理上都應昌倉官比同萬億庫官例二周歲爲滿
於應得資品上擬升一等和林昔寶赤八刺哈孫孔古烈
倉改立從五品提舉司提舉一員同提舉副提舉各一員
周歲爲滿於應得資品上擬升二等任回遷用甘肅二路
每處設正六品監支納一員倉使倉副各一員二周歲爲
滿先升一等任滿交割別無短少又升一等

稅務官遷轉之制至元初分三等辦課百錠之上設提領
一員使一員五十錠之上設務使一員五十錠之下設都
監一員十錠以下從各路差人管辦都監歷三界升務使
一周歲爲滿月日不及者通理務使歷三界升提領提領

元史卷八十

志

選舉

六

歷三界受省劄錢糧官再歷三界始於資品錢穀官并雜
職任用所辦諸課增虧分數升降人員增六分升二等增
三分升一等增不及分數者量與從優其虧兌一分者降
一等提領二年爲滿省部於流官內銓注萬錠之上擬從
六品五千錠之上擬正七品二千錠之上擬從七品千錠
之上正八品五百錠之上從八品大使副使俱周歲交代
至大三年詔定立辦課例百錠之下院務官分爲三等五
十錠之上爲上等設提領一員受省劄大使一員受部劄
二十錠之上爲中等設大使副使各一員二十錠之下爲
下等設都監同監各一員俱受部劄竝以一年爲滿齊界
交代都監同監四界升副使又四界升大使又三界升提
領又三界入資品錢穀官并雜職內遷用行省差設人員

各添兩界升轉仍自立界以後爲始理算月日竝於有升轉出身人員內定奪不許濫用白身

凡選取宣使奏差之制至元十九年部擬六部奏差額設數目每十名內令各部選取四名闕九月與從九品餘外合設數目俱於到部巡檢提領案牘都吏日內選取二十九年省議行省行院宣使於正從九品有解由職官內選取如是不敷於各道宣慰司廉訪司三考奏差內并本衙門三考典吏內選取仍須色目漢人相參其自行踏逐者考滿例降一等須歷九月方許出職內外諸衙門宣使以色目漢人相參九月十月爲滿自行踏逐者降一等凡內外諸衙門宣使通事知印奏差都省宣使有闕於臺院等衙門正從八品職官內選補如係都省直選人員不拘

元史卷八十一

志

選舉

九

此例又樞密院宣使宣政院宣使中政院宣使御史臺宣使此四者均於正從九品職官內選取仍須色目漢人相參自行踏逐者考滿例降一等須歷九月方許出職宣慰司奏差於本衙門三考典吏內選取大都及山東運司奏差於近下錢穀官內任用宣徽院典吏九月十月補宣使并所轄寺監令史延祐三年省議各衙門典吏須歷九月方許轉補奏差

凡匠官遷轉之制至元九年工部驗各管戶數二千戶之上至一百戶之上隨路管匠官品級東平雜造提舉司并隨路織染提舉司二千戶之上提舉正五品同提舉從六品副提舉從七品千戶之上提舉從五品同提舉正七品副提舉正八品五百戶之上至一千戶之下提舉正六品

同提舉從七品副提舉從八品三百戶之上大使正七品副使正八品一百戶之上大使從七品副使從八品一百戶之下院長一員同院務例不入流品量給食錢二十二年凡選取升轉匠官資格元定品級員數提舉司二千戶之上者無之千戶之上提舉從五品同提舉正七品副提舉正八品五百戶之上千戶之下提舉正六品同提舉從七品副提舉從八品使副三百戶之上局使正七品副使正八品一百戶之上局使從七品副使從八品一百戶之下院長一員比同院務例不入流品如正六品匠官有闕於已授從六品散官人員內選注通歷九月升從五品又三考擬升正五品別無正五品匠官名闕升加正五品散官如歷任年深至日斟酌定奪元貞元年準擬三千戶

元史卷八十七

志 選舉

三

之上提舉司從五品提舉從五品同提舉正七品副提舉正八品二千戶之上提舉司正六品提舉正六品同提舉從七品副提舉從八品一千戶之上局使正七品副使正八品五百戶之上局使從七品副使正九品五百戶之下院長一員

藩府官遷轉之制凡諸王封地與所受湯沐邑得自舉其人以名聞朝廷而後授其職凡投下官必用蒙古人及色目人各投下總管府長官不遷外其所屬州縣長官於本投下所分城邑內遷轉其應給印官員若已受宣命及諸王令旨及省府樞密院制府左右部劄付者驗戶給印至元十九年詔各投下長官宜依例三年一次遷轉省臣奏江南諸王分地長官已令如例遷轉其閒若有兼管軍鎮

守爲達魯花赤者一體代之似爲不宐合令於投下長官之上一同蒞事二十三年令諸王駙馬并百官保送人員若曾仕者驗資歷於州縣內相閒用如無歷仕從本投下自用皇慶二年詔各投下分地城邑長官其常選所用者居眾人之上投下所委者爲添設各投下有闕用人自於其投下內選用不許冒用常選內人

凡獲盜賞官之制大德五年詔獲強盜五人賞一官捕盜官及應捕人本境失盜而獲他境盜者聽功過相補獲強盜過五人捕盜官減一資至十五人升一等應捕人與一官不在論賞之例

凡玉典赤遷除之制歷九月者除從七品下縣達魯花赤進義副尉百月以上者官敦武校尉

元史卷八十

志

選舉

凡蠻夷官之制播州宣撫司保蠻夷地分副長官係遠方蠻夷不拘常調之制惟所保多濫自後除襲替土官外急闕久任者依例以相應人舉用不許預保違者罪之

入粟補官之制元初未嘗舉行天祿三年內外郡縣亢旱爲災於是用太師荅刺罕等言舉而行之凡江南陝西河南等處定爲三等令富民依例出米無米者折納價鈔陝西每石八十兩河南并腹裏每石六十兩江南三省每石四十兩實授茶鹽流官如不仕讓封父母者聽錢穀官考滿依例升轉陝西省千五百石以上從七品千石以上正八品五百石以上從八品三百石以上正九品二百石以上從九品百石以上上等錢穀官八十石以上中等錢穀官五十石以上下等錢穀官三十石以上旌表門閭河南

并腹裏二千石以上從七品千五百石以上正八品千石
以上從八品五百石以上正九品三百石以上從九品二
百石以上上等錢穀官百五十石以上中等錢穀官百石
以上下等錢穀官江南三省萬石以上正七品五千石以
上從七品三千石以上正八品二千石以上從八品千石
以上正九品五百石以上從九品三百石以上上等錢穀
官二百五十石以上中等錢穀官一百石以上下等錢穀
官先已入粟遙授虛名今再入粟者照依資格驗其糧數
實授茶鹽流官陝西千石以上從七品六百六十石以上
正八品三百三十石以上從八品一百石以上正九品百
三十石以上從九品河南並腹裏千三百三十石以上從
七品千石以上正八品六百六十石以上從八品三百二

十石以上正九品二百石以上從九品江南三省六千六
百六十石以上正七品三千三百三十石以上從七品二
千石以上正八品千三百三十石以上從九品先已入粟
實授鹽茶流官今再入粟者驗其糧數加等升除陝西七
百五十石五百石二百五十石百五十石百石以上河南
并腹裏千石七百五十石五百石二百五十石以上僧道
入粟三百石以上賜六字師號都省給之二百石以上四
字師號百石以上二字師號禮部給之四川省富實民戶
有能入粟赴江陵者依河南省補官例行之夫入粟補官
雖非先王之政然荒札之餘民賴其助且其職止於七品
而不敢過又止補錢穀茶鹽流官而不及清要尚有節制
哉尚有節制哉至正乙未春中書省臣奏遣兵部員外郎

劉謙來江南募民入粟補路府州司縣官自五品至九品有差非同舊制僅茶鹽場務者比其時盜賊蠭起雖功名倂人無有願之者松江知府崔思誠拘集縣屬巨富點科十二名眾皆號訴不願迫以拷掠抑使承伏卽填空名告身授之平江路達魯花赤六十者獨力爭不可竟無一人應募崔思誠聞而大愧蓋名器不足以動人而國將亡矣

舊在食貨志今移入

蔭子之法不問本官去任致仕身故其承蔭之人年及二十五以上者聽凡諸用廕者以嫡長子若嫡長子有廢疾廢嫡長子之子孫曾玄同如無廢嫡長子同母弟曾玄同如無廢繼室所生如無廢次室所生如無廢妾子如絕嗣者旁廕其親兄弟各及子孫如無旁廕伯叔及其子孫凡

元史卷八十一

志

選舉

三

諸用廕者其品職孫降子曾孫降孫其妾生子及旁廕者皆降一等凡自九品依例遷至正三品止於本等流轉二品以上選自特旨凡管匠官止於管匠官內遷用其身故匠官之子亦不得依管民官品級承廕凡軍民官陣亡軍官襲父職民官陣亡者其子比父職降二等敘其孫若弟復降一等此外諸職官子孫廕敘正一品子正五品敘從一品子從五品敘正二品子正六品敘從二品子從六品敘正三品子正七品敘從三品子從七品敘正四品子正八品敘從四品子從八品敘正五品子正九品敘從五品子從九品敘正六品子近上錢穀官於巡檢內用雜職於省劄錢穀官內用從六品子近上錢穀官正七品子酌中錢穀官從七品子近下錢穀官凡諸色目人比漢人優一等廕敘

達魯花赤子孫與民官子孫一體廕敘旁廕照例降敘凡諸職官子孫承廕先當俛使一年並不支俸至大四年又詔廕官須試一經一史能通大義者免俛使不通者發還學習蒙古色目願試者聽仍量進一階

遠省官遷調之制凡閩廣川蜀雲南遠省官員難赴京師者朝廷每三歲遣使與行省銓注而以監察御史往蒞之至元十九年省議江淮州郡遠近險易不同亦量分三等若腹裏常調官員遷入兩廣福建溪洞州郡者例升二等其餘州郡例升一等福建兩廣官員五品以上照勘員闕移咨都省銓注六品以下就使委用開具咨省其甘肅中興行省所轄係西夏邊地除本籍見任官外其由腹裏遷往者升二等二十二年詔管民官腹裏遷去四川升一等

元史卷八十志

選舉

五

接連溪洞升二等四川見任官遷往接連溪洞升一等若遷去溪洞諸蠻夷別議定奪達魯花赤就彼處無軍蒙古軍官內遷擬不爲常例二十八年詔腹裏官員遷去雲南近裏城邑擬升二等若極邊重地更升一等仍以三十月爲滿升轉其蒙古土人及招附百姓有功之人不拘此例二十九年詔福建兩廣官員歷兩任滿者遷於接界一任滿日歷江南一任許入腹裏遷轉願畱閩廣者聽

凡行省遷調常格於所轄路府州縣內先儘急闕次及滿任急闕或員闕不能相就者於應敘職官內選用雖有超越不過一等若所轄地內有遐荒煙瘴險惡重地除土官外依例公選銓注其有超用不過二等凡軍官匠官醫官站官各投下人等例不轉入流品者雖資品相應不許銓

注

凡文武散官多采用金制建官之初散官例降職事二等至元三十年始升官職對品九品無散官謂之平頭敕蒙古色目初授散官或降職事再授職雖不降必俟官資合轉然後升職漢人初授官不及職再授則降職授官惟封贈廕敘官職各從一高必歷官至二品則官必從職始不復用理算法至治初稍改之尋復其舊此外月日不及者惟歷繁劇及獲功賞者得從優由內地入邊遠者從優憲臺舉廉能政蹟者從優以選出使絕域者從優然亦各有其格

凡保舉職官之制各廉訪司所按治城邑內有廉慎幹濟者歲舉二人九年詔臺院部五品以上官各舉廉能識治體者三人行省臺宣慰司廉訪司各舉五人其翰林院國子學係文翰師儒之官須求資格相應之人不得預保若布衣之士果才德素著必合不次超擢者別具以聞

元史卷八十一

志 選舉

五

凡遷官之法從七品以下屬吏部正七品以上屬中書三品以上非有司所與奪由中書取進止自六品至九品爲敕受則中書牒署之自一品至五品爲宣授則以制命之三品以下用金寶二品以上用玉寶有特旨者則有誥詞其理算論月日遷轉憑散官內任以三十月爲滿外任以三歲爲滿錢穀典守以二歲爲滿而理考通以三十月爲滿則內任官率一考升一等十五月進一階京官率一考視外任減一資外任官或一考進一階或兩考升一等或三考升二等四品則內外考通理毫不可越然前任少則

後任足之或前任多則後任累之一考者及二十七月兩考者及五十七月三考者及八十一月以上遇升則借升而補以後任此又其權衡也

凡超格選用之制中書省參議都司郎中員外高第者或得拜參預政事或遷六曹尚書侍郎及臺幕官監察御史或出爲憲司官其中外屬僚優擢者外任或由州縣爲長伯在朝或諸院由判官至使或寺監由丞至卿或館閣由屬官至學士皆有遞升之法以示用人重於用法焉又單官或準實授或普減資升等或內升等或外減資或外減內不減斯則恩數之不常有者惟四品以下者有三品則遞進一階至正議大夫而止若勳臣世胄侍中貴人上命超遷則不論選格亦有傳敕中書送部覆奏或其人不稱以致繳奏者斯則歷代以來封駁之良法也

元史卷八十一

志

選舉

三

凡官吏遷敘限期至元十年議舊以三十月遷轉太速以六十月遷轉大遲二十八年定隨朝以三十月爲滿在外以三周歲爲滿錢穀官以得代爲滿吏員以九十月日出職職官轉補與職官同

凡減資升等大德九年詔外任流官升轉甚遲但歷在外兩任五品以下並減一資部議外任五品以下職官若歷過隨朝及在京倉庫官鹽鐵等職曾經升等減資外以後至大德九年格前歷及在外兩任或一任六十月之上者並與優減未及者不拘此格至治二年親祭太廟恩詔四品以下諸職官不分內外普減一資有出身應入流品者考滿任回依上優減天祿元年詔以兵興內外官吏供給

繁勞在京者升一等至三品止在外者減一資

凡注官守闕之制至元八年議已除官員無問月日遠近許準守闕外未奏未注者許注六月滿闕六月以上不得預注二十二年詔員多闕少守闕一年年月滿者照闕注授餘無闕者令候一年大德元年以員多闕少宜注二年凡注官避籍之制至元五年議各路地里闊遠若更避路恐員闕有所礙止宜斟酌避籍銓選

凡官吏因喪去官之制大德元年議雲南官員如遇祖父母父母喪葬其家在中原者竝聽解任奔赴二年詔凡值喪除蒙古色目人員各從本俗外管軍官并朝廷職不可曠者不拘此例天祿二年部議蒙古色目人願丁父母憂者聽

元史卷八十七 志 選舉

三

凡省部令史譯史通事等至元六年省議舊例百二十月出職後因案牘繁冗改以九十月爲滿考滿通理九十月出職與正七職事竝免回降

凡歲貢吏員中書省掾於樞密院御史臺令史內取臺院令史於六部令史內取六部令史以諸路歲貢人吏補充內外職官材堪省掾及院臺部令史者亦許擢用至元十九年省議以省掾考滿資品既高責任亦重皆自歲貢中出若不教養銓試必致人材失真今擬定例於後諸州府隸省部者儒學教授選本地儒戶子弟入學讀書習業非儒戶而願學者聽遇按察司本路總管府歲貢之時於學生內選行義修明文學優贍通經史達時務者保申解貢各路司吏有闕於所屬衙內人吏內選取委本路長官參

佐同儒學教授試以行移算術其字畫謹嚴語言辯利詩書論孟內通一經者爲中式然後補充凡按察司書吏有闕於府州司吏內選補至歲貢時本州本路再試貢解各路歲貢吏本官司於見役人內公選以性行純謹儒吏兼通者爲上才識明敏吏事熟嫻者次之月日雖多才能無取者不許呈貢各道按察司上路總管府凡三年一貢儒吏各一人下路二年貢一人以次籍記遇各部令史有闕補用若隨路司吏及歲貢儒人先補按察書吏然後貢之於部元貞元年詔諸路有儒通吏事吏通經術性行修謹者各路薦舉廉訪司試選每道歲貢二人省臺委官立法考試必中程式儒吏兼通方許錄用轉補各部寺監令史凡選府州教授年四十以下願試吏員程式許補各部令史除南人已試者別無定奪到部未試之人依例考試各道廉訪司書吏先儘儒士不敷者吏員內充貢各歷一考依例試貢

元史卷八十志

選舉

三

凡補用吏員至元十一年省議有出身人員遇省掾有闕擬合於正從七品文資職官并臺院六部令史內從上名轉補翰林兩院擬同六部令史有闕於隨路儒學教授通吏事人內選補樞密院御史臺令史省掾有闕從上轉補考滿依例除授又於正從八品文資官及六部令史內轉補省斷事官令史與六部令史一體三考出身於部令史內發補少府監令史擬於六部竝諸衙門考滿典吏內補用

各道廉訪司通事譯史出身比依書吏一體考滿正九奏

差考依通事譯史降二等量擬於錢穀官并巡檢內任用
諸路寶鈔提舉司奏差九月爲滿於酌中錢穀官內任
用大都山東運司奏差及河間運司巡鹽官皆滿九月
近下錢穀官內任用

凡庫藏司吏庫子等出身上都資乘庫衛尉院利器庫壽
武庫庫子九月近上錢穀官內任用泉府司富藏庫及
大都畱守司兼少府監器備庫本把庫子六月近下錢
穀官內任用大府監行內藏庫子三周年爲滿省劄錢穀
官內遷敘宣徽院生料庫庫子本把并太醫院所轄御藥
局院本把出身例六月近上錢穀官一體遷敘中御府
奉宸庫庫子以三周歲受省劄錢穀官本把六月近上
錢穀官內任用萬億四庫左右八作司富寧寶源等庫各

元史卷八十

志 選舉

无

設色目司庫二名俱於樞密院各衛色目軍內選差考滿
巡檢內任用都提舉萬億庫提空案牘比常選人員任回
減一資升用司吏三十五人除色目四外漢人有關於
大都總管府轉運司漕運司下名司吏內選取

凡書寫銓寫書吏典吏轉補之法各部典吏并左右部照
磨所架閣庫典吏於都省參議府左右司客省使令史書
寫內以次轉補如補不盡六月轉補各監令史已上吏
目內任用樞密院典吏銓寫依御史臺典吏一體六月
轉部轉補不盡六月已上於都目內任用御史臺典吏
遇按察書吏有闕從上挨次轉補通理六月補各道按
察司書吏部令史有闕亦行收補土都畱守司兼本路都
總管府典吏九月補本司宣使考滿依例定奪漕運使

司令史九月提控案牘內任用如年四十五以下願充寺監令史者聽省院臺部書寫銓寫典吏人等出身與各道宣慰司按察司隨路總管府歲貢吏員一體轉部書寫人等止令轉寺監等衙門令史六部銓寫典吏并左右部照磨所架閣庫典吏一考之上遇省書寫典吏月日補不盡者六月轉補寺監令史御史臺典吏三十月依廉訪司書吏轉補察院三十月轉部補不盡者考滿從八品遷用外省行臺典吏三十月轉補行臺察院書吏再歷三十月發補各道宣慰司令史參議府令史四十五月轉部令史光祿寺典吏考滿轉補本衙門奏差三品衙門典吏歷三考升宣使補不盡本衙門於相應闕內委用部典吏一考之上轉省典吏補不盡者三考補本衙門奏差兩考之

元史卷八十

志

選舉

三

上發寺監宣慰司奏差翰林國史院蒙古書寫四十五月轉補寺監蒙古必闍赤行御史臺察院書吏若係腹裏歲貢廉訪司見役書吏選人數須歷一考以上名貢部下名轉補察院各部蒙古必闍赤如係翰林院選發之人四十五月遇各衙門譯史有闕依次與職官相參補用不敷從翰林院發補詹事院蒙古書寫如係翰林院選發之人四十五月遇典用等監衙門譯史有闕依次與職官相參補用不敷從翰林院選發和林行省典吏轉理問所令史四十五月發補稱海宣慰司令史轉補不盡典吏須歷六十月依上發補職官先嘗爲廉訪司書吏者避元役道分并其餘相應職官歷三十月減一資又教授學正學錄并府州提控案牘都吏目內委充職官各理本等月日其餘

歲貢儒吏依例選用又廉訪司奏差內臺行臺典吏有能者歷一考之上選充書吏通儒書者充儒人數通吏業者充吏員數天祿元年臺議各道書吏額設十六人有闕宜用終場下第舉子四人教授四人各路司吏四人通吏職官四人委文資正官試驗相應方許入部

凡衛翼吏員升轉各處都府并總管高麗女真漢軍萬戶府及臨清萬戶府秩三品本府令史有闕於一考都目兩考吏日并各衛三考典吏內呈院發補九月歷提控案牘一任於各萬戶府知事內選用各衛翼都日得代兩考者受院劄提控案牘內銓注三考升千戶所知事月日不及者各衛翼挨次前後得代日期於都目內貼補各衛提控案牘年過五旬已歷四考者升千戶所知事及兩考年

元史卷八十志

選舉

三

四十五歲以下發補各衛令史不及兩考者止於案牘內銓注百有二十月於千戶所知事內選用各處蒙古都元帥府額設令史有闕於本府所轄萬戶府并奧魯府上名司吏年四十以下者選取歷百二十月再歷提控案牘一任於萬戶府知事內遷用行省所轄萬戶府司吏有闕於本翼上千戶所上名司吏內取補九月充吏目一考轉都目一考除千戶所提領案牘一考升萬戶府提控案牘歷兩考通歷省除百有五十月於萬戶府知事內區用凡各萬戶府司吏蒙古都萬戶府司吏有闕於千戶所司吏內選補歷百有二十月升千戶所提領案牘一考萬戶府案牘通理九月轉萬戶府知事漢軍萬戶府并所轄萬戶府及奧魯府司吏於千戶所司吏內補用九月充

吏目一考都目一考升千戶所或都千戶所奧魯府提控案牘再歷萬戶府或都府奧魯府提控案牘兩任於萬戶府知事內用各處都府令史於一考都目兩考吏目并各衛請俸三考典吏內九十月爲滿再歷提控案牘一任於各萬戶府知事內選用各處蒙古軍元帥府令史於本府所轄萬戶府并奧魯府上名司吏內年四十以下者選補歷百有二十月再歷提控案牘一任於萬戶府知事內選用各省鎮撫司令使於各萬戶府上名六十月司吏內選取受行省劄三十月爲滿再於各萬戶府提控案牘內歷百有二十月知事內定奪各衛翼令史有出身轉補者九十月正八品無出身者從八品內定奪

凡提控案牘都吏目受院劄九十月爲滿行省行院劄百

元史卷八十志

選舉

三

有二十月爲滿於萬戶府知事內用案牘年過五旬已歷四考者於千戶所知事內定奪外及兩考四十五以下發補各衛令史若不及考者止於案牘內銓注百有二十月於千戶所知事內用各衛翼都目請俸兩考者院劄提控案牘內銓注歷三考升千戶所知事月日不及者各衛翼都目內貼補如各衛典吏轉充者六十月直隸本院萬戶府弩軍屯田千戶所鎮撫司提控案牘內銓注無俸人轉充者二十月依上升轉鎮撫司屯田弩軍千戶所都目依中州例改設案牘止請都目俸三十月爲滿依例注代至元九年部議凡總府續置提控案牘多係入仕年深比之巡檢例同考滿轉入從九二十五年部擬各路司吏實歷六十月升吏目兩考升都目歷一考升提控案牘兩考升

正九大德二年省準京城內外省倉典吏例於大都路州司吏縣典史內勾補二周歲轉升吏目除行省所轄外腹裏下州并雜職衙門計設吏目一百餘處俱以三十月爲滿十一年江浙省臣言各路提控案牘改受敕牒不見通例部照江北提控案牘皆自府州司縣轉充路吏請俸九月方得吏目一考升都目都目一考升提控案牘正九品通理二百一十月入流其行省所委者九月與從九品今議行省所設提控案牘都吏目合依江北由司縣府州轉充路吏通理月日考滿方許入流凡吏員考滿除提控案牘都吏目者其途不一大略由司吏書吏補充者爲多

考課

元史卷八十志

選舉

三

凡隨朝職官一考升一等兩考通升二等止六部侍郎正四品依舊例通理八月升三品左右司郎中員外郎都事考滿升二等六部郎中員外郎主事三十月考滿升一等兩考通升二等

凡官員考數省部定擬從九品擬歷三任升從八品正九品歷兩任升從八品正八品歷三任升從七品從七品歷三任呈省正七品歷兩任升從六品從六品通歷三任升從五品正六品歷兩任升從五品從五品轉至正五品緣四品闕少通歷兩任須歷上州尹一任方入四品內外正從四品通理八月升三品

凡吏員考滿授從六品省令史出身中統四年以前六品升遷已後七品除授至元之後事繁責重依準中統四年

已前考滿一體注授三司僚屬蒙古必闔赤掾史宣使等依都省設置若不由臺院轉補者降等敘監修國史僚屬依三司所設非臺院轉補者降等敘

凡吏員考滿授正七品者一院臺大司農司令史一札魯花赤令史譯史一通政院令史一宣徽院總制院泉府司都護府內史府將作院崇福司詹事院各掾史令史一翰林國史院集賢院令史又安西王相府首領官令史與臺院吏屬一體遷轉及福建省征瓜哇所設人吏出征回還俱同考滿出身

凡吏員考滿授從七品者一部令史譯史通事人等一省斷事官令史與六部令史一體出身一太府監及中尉府行工部令史一四怯薛令史一太史院令史一大都留守司兼少府監令史一行省臺院令史一典瑞典寶太府利用等四監人吏其餘寺監令譯史正八品奏差正九品皆同考滿出身

凡吏員考滿授正八品者一祕書監令史一太常寺令史一少府監尙牧監令史一河南等路宣慰司令史一樞密院斷事官令史一廣西海北海南道宣慰司令史譯史奏差人等一詹事院家令府正二司令史後改二司爲內宰宮正其令史依元定遷敘一尙醞監令史一雲南省羅羅斯宣慰司兼管軍萬戶府首領官令史一尙舍監令史一陝西四川行省順元等路軍民宣慰司令譯史一太史院武備寺光祿寺等令譯史太醫院係宣徽院所轄令史一給事中兼修起居注人吏一侍儀司令史一延慶司令史

一太僕寺令史一拱衛直都指揮使司令史一蒙古等衛
令史樞密院所轄都元帥府萬戶府各衛令史一宣政院
斷事官令史一左右兩江宣慰司都元帥府令史一儀鳳
司令史一孛可孫合譯史一只爾哈忽昔寶赤八刺哈孫
達魯花赤令史一哈迷只哈赤八刺哈孫達魯花赤令史
一都水監合譯史一闌遺監合譯史一鷹房總管府人吏
一和林總管府司吏轉補稱海宣慰司令史一晉王位下
斷事官衛率府句當人員令史一徽政院繕珍司延福司
衛候司掌飲司各令史譯史

凡吏員考滿授正九品者一宮籍監令史一行臺察院書
吏一各道廉訪司書吏

凡官員致仕諸職官年及七十精力衰者令其致仕三品
以下於本身品級加散官一等致仕

元史卷八十志

選舉

差

凡封贈之制至元初惟一二勳舊之家以特恩見褒尙無
成法至元二十年制考課雖以五事責辨管民官而無激
勸之方徒示虛文究無實效自後每歲終考課管民官五
事備具及內外諸司職任有成效者爲中考第一考對官
品加妻封號第二考令子弟承廕敘仕第三考封贈祖父
母父母品格不及封贈者量遷官品其有政績殊異者不
須升擢仰中書參酌舊制出給誥命至大二年詔流官五
品以上父母正妻七品以上正妻令尙書省議行封贈之
制正從一品封贈三代爵國公勳正上柱國從柱國母妻
竝國夫人正從二品封贈二代爵郡公勳正上護軍從護
軍母妻竝郡夫人正從三品封贈二代爵郡侯勳正上輕

車都尉從輕車都尉母妻竝郡夫人正從四品封贈父母
爵郡伯勳正上騎都尉從騎都尉母妻竝郡君正五品封
贈父母爵縣子勳驍騎尉母妻竝縣君從五品封贈父母
爵縣男勳飛騎尉母妻竝縣君正從六七品封贈父母父
止用散官母妻竝宜人正從一品至五品宣授六品至七
品敕牒如應封贈三代者曾祖父母一道祖父母一道父
母一道生者各號給降封贈者一品至五品竝用散官勳
爵六品七品止用散官職事從一高封贈曾祖降祖一等
祖降父一等父母妻竝與夫子同父母在仕者不封雖在
仕而願棄職就封者聽父母應封而讓曾祖父母祖父母
者聽諸子應封父母嫡母在所生之母不得封嫡母亡得
竝封若所生母未封贈者不得先封其妻諸職官曾受賊

元史卷八十志

選舉

五

不許申請若封贈之後犯賊竝行追奪其父祖原有官進
一階者不在追奪之例父祖原有官者隨其所帶文武官
上封贈若已是封贈之官止於本等官上許進一階階滿
者更不在封贈之限如子官至四品其父祖已帶四品上階之類或兩子當封
者從一高文武不同者從所請婦人因其子封贈而夫及
子兩有官者從一高封贈曾祖母祖母竝母生封竝加太
字若已亡歿或曾祖祖父父在者不加太字職官居喪應
封贈曾祖父母祖父父母者聽其應受封之人居曾祖父母
祖父母父母舅姑夫喪者服闋申請應封贈者有使遠死
節有臨陣死事者驗事特議加封應封妻者止封正妻一

人如正妻已歿繼室亦止封一人餘不在封贈之例婦人
因夫子得封者不許再嫁如不遵守將所受宣敕追奪斷

罪離異父母曾任三品以上官亡歿生前有勳勞爲上知
遇者子孫雖不仕其實迹赴所在官司保結申請驗事迹
可否量擬封贈無後者許有司保結申請曾祖父母祖父
母父母曾犯十惡奸盜除名等罪及例所封妻非是禮娶
正室或係再醮倡優婢妾並不許申請正從七品至正從
六品止封一次上至正從一品亦每品級升一次封贈一
次凡封贈流官父祖曾任三品以上者許請諡如立朝有
大節功勳在王室者許加功臣之號至治三年詔封贈之
典本以激勸忠孝今後散官職事勳爵依例加授外任官
員竝許在任申請其餘各依舊制泰定元年詔犯贓官員
不得封贈沈鬱既久宐許自新有能滌慮改過再歷兩任
無過者許所管上司公保監察御史廉訪司覈察其實依

例申請

元史卷八十

志

選舉

七

